



安徽通志

ル 5
1575
60



門五
卷
1575
60

重修安徽通志卷一百七十七

人物志

名賢

舊志謂安徽山川融結扶輿清淑之氣代有所鍾然自周漢至我

聖朝道光之初所志安徽名賢僅十有八人而此十八人中惟閔子受學聖門朱子發明聖道張英事

聖

祖仁皇帝三十餘年得與見知之列其次若管仲蹇叔文翁朱邑召信臣桓榮范滂劉宏包拯呂公著汪立信左光斗霸才循吏經生節義忠清之士也史稱李紳暴刻吳淵嚴酷猶取其節操才具又其次也至老子非今亳州人江南通志已詳辯之所當刪正者也李天馥為政持大體方苞秉經守禮學問湛深今並補

重修安徽通志

卷一百七十七

人物志

名賢



著於篇曹振鏞歷事

三朝

列聖鑒其忠孝

宣宗稱為股肱心膂之臣深倚賴而人不知曹與張蓋後先輝映矣述

人物志名賢傳

周管仲夷吾者潁上人也韋昭云管夷吾姬姓之後管嚴之子敬仲也補按管氏名夷吾字仲諡曰

也見索隱引世本少時常與鮑叔牙遊鮑叔知其賢善遇之

已而鮑叔事齊公子小白管仲事公子糾及小白立公子糾死

管仲囚焉鮑叔遂進管仲管仲既用任政於齊桓公以霸九合

諸侯一匡天下以區區之齊在海濱通貨積財富國強兵與俗

同好惡故其稱曰倉廩實而知禮節衣食足而知榮辱上服度

則六親固四維不張國乃滅亡下令如流水之源令順民心故

論卑而易行俗之所欲因而予之俗之所否因而去之其為政

也善因禍而為福轉敗而為功貴輕重慎權衡桓公實怒少姬

南襲蔡管仲因而伐楚責包茅不入貢於周室桓公實北征山

戎管仲因而令燕修召公之政柯之會桓公欲背曹沫之約管

仲因而信之諸侯由是歸齊史記本傳管子八十六篇在道家漢書藝文

志七略云十八篇在法家

蹇叔銍人秦之賢大夫也先是秦繆公授百里奚以國政讓曰

臣不及臣友蹇叔蹇叔賢而世莫知臣常遊困於齊而乞食銍

人徐廣曰銍一作銍張守節曰銍地名在沛縣蹇叔收臣臣欲事齊君無知蹇叔止

臣得脫齊難遂之周王子頹欲用臣蹇叔止臣遂得免誅事虞

君蹇叔止臣臣不用其言遂及於難是以知其賢於是繆公使

人厚幣迎蹇叔以為上大夫繆公將襲鄭蹇叔不可公曰子不

知也遂使百里奚子孟明視蹇叔子西乞術及白乙丙將兵行

果敗於殽三將皆為晉所虜及晉許歸三帥繆公素服郊迎嚮

師而哭曰孤違蹇叔以辱三子作秦誓其篇中所謂一个臣蓋

指蹇叔也

史記秦本紀
史記正義

閔子名損字子騫

鄭康成目錄云魯
人家語云齊人

少孔子十五歲不仕大夫

不食汗君之祿

史記

唐開元八年從祀孔子廟宋祥符元年封費

國公

國朝康熙四十四年

聖祖仁皇帝賜額曰德行之科遣江南學政內閣學士張廷樞懸宿州

閔子祠俾裔孫之在宿者世奉祠祭

宿州志

按四庫目錄云閔子本宿人春秋時宿屬青州為齊地故家

語以為齊人

舊通志

漢文翁廬江舒人少好學通春秋以郡縣吏察舉景帝末為蜀

郡守仁愛好教化見蜀地僻陋欲誘進之選郡小吏開敏有材

者張叔等十餘人遣詣京師受業博士或學律令減省少府用

度買刀布蜀物齎計吏以遺博士數歲蜀生皆成就還歸文翁

以為右職用次察舉官有至郡守刺史者又修起學宮於成都

市中招下縣子弟以為學官弟子為除更繇高者以補郡縣吏

次為孝弟力田常選學官僮子使在便坐受事每出行縣益從

學官諸生明經飭行者與俱使傳教令出入閭閻見者榮之爭

欲為學官弟子富人至出錢以求之繇是大化蜀地學於京師

者比齊魯焉至武帝時乃令天下郡國皆立學校官自文翁為

漢書本傳

之始云文翁終於蜀吏民為立祠堂歲時祭祀不絕

朱邑字仲卿廬江舒人少為舒桐鄉嗇夫廉平不苛以愛利為

行未嘗笞辱人存問耆老孤寡遇之有恩吏民愛敬焉遷太守
卒史舉賢良爲大司農丞遷北海太守以治行第一入爲大司
農公正不可交以私貢薦賢士大夫多得其助者居處儉節祿
賜以共九族鄉黨神爵元年卒下詔稱揚賜邑子黃金百斤以
奉祭祀初邑病且死屬其子曰我故爲桐鄉吏其民愛我必葬
我桐鄉後世子孫奉嘗我不如桐鄉民其子葬之桐鄉西郭外
民果共爲起冢立祠歲時祭祀至今不絕

漢書本傳

召信臣字翁卿九江壽春人以明經甲科爲郎出補穀陽長舉
高第遷上蔡長其治視民如子超爲零陵太守病歸復徵爲諫
大夫遷南陽太守信臣勤力有方略好爲民興利務在富之時
行視郡中水泉開通溝瀆起水門隄閘凡數十處以廣灌溉多
至三萬頃作均水約束刻石田畔以防分爭禁止奢靡斥罷游

敖吏民親愛號曰召父賜黃金四十斤遷河南太守治行第一
竟甯中徵爲少府列於九卿卒於官元始四年詔祀百辟卿士
有益於民者歲時郡二千石率屬官行禮奉祠信臣冢而南陽

亦爲立祠

漢書本傳

桓榮字春卿沛郡龍亢人少習歐陽尙書事博士九江朱普十
五年不窺家園普卒榮奔喪九江因留教授王莽亂榮抱其經
書與弟子逃匿山谷講論不輟顯宗立爲太子選求明經以榮
弟子何湯言帝卽召榮令說尙書甚善之拜爲議郎使授太子
每朝會輒令榮於公卿前敷奏經書拜爲博士車駕幸太學會
諸博士論難於前榮溫恭蘊藉辨明經義儒者莫及常令止宿
太子宮侍講拜爲少傅賜以輜車乘馬榮大會諸生陳其車馬
印綬曰今日所蒙稽古之力也建武三十年拜爲太常顯宗卽

位尊以師禮乘輿常幸太常府令榮坐東面設几杖天子親自
執業永平二年三雍初成拜榮為五更封為關內侯及卒帝變
服臨喪送葬賜冢塋於首山之陽

後漢書本傳

范滂字孟博汝南征羌人

謝承書曰汝南細陽人案細陽今太和縣是

少厲清節為

州里所服舉孝廉光祿四行時冀州饑荒盜賊羣起以滂為清
詔使案察之登車攬轡慨然有澄清天下之志及至州境守令
自知臧汙望風解印綬去遷光祿勳主事棄官歸復為太尉黃
瓊所辟後詔三府掾屬舉謠言滂奏刺史二千石權豪之黨二
十餘人尚書責滂所劾猥多疑有私故滂對曰農夫去草嘉穀
必茂忠臣除姦王道以清若臣有二甘受顯戮滂觀時艱知意
不行因投劾去太守宗資聞其名請署功曹委任政事嚴整疾
惡其有行違孝悌不軌仁義者皆埽跡斥逐顯薦異節抽拔幽

陋中人以下莫不歸怨乃指滂之所用以為范黨後牢修誣言
鉤黨滂坐繫黃門北寺獄獄吏謂曰凡坐繫皆祭皋陶滂曰皋
陶古之直臣知滂無罪將理之於帝如其有罪祭之何益獄吏
將加掠考滂以同囚多嬰病乃請先就格與同郡袁忠爭坐楚
毒桓帝使中常侍王甫以次辨詰滂忠越次而進王甫詰曰君
為人臣不推忠國而共造部黨諸所謀結並欲何為滂曰臣聞
仲尼之言見善如不及見不善如探湯欲使善善同其清惡惡
同其汙謂王政之所願聞不悟更以為黨甫曰卿更相拔舉迭
為唇齒有不合者見則排斥其意如何滂乃慷慨仰天曰古之
循善自求多福今之循善身陷大戮身死之日願埋滂於首陽
山側上不負皇天下不愧夷齊甫愍然改容乃得並解桎梏事
釋南歸汝南南陽士大夫迎之者數千兩同囚鄉人殷陶黃穆

亦免俱歸並衛侍於傍應對賓客滂謂之曰今子相隨是重吾
 禍也遂遜還鄉里初滂等繫獄尚書霍諝理之及得免往候請
 而不謝或讓之對曰叔向嬰罪邢奚救之未聞羊舌有謝恩之
 辭邢老有自伐之色建甯二年大誅黨人詔下急捕滂等督郵
 吳導至縣抱詔書閉傳舍伏牀而泣滂聞曰必為我也即自詣
 獄縣令郭揖大驚出解印綬引與俱亡滂曰死則禍塞何敢以
 罪累君又令老母流離乎其母就與之訣滂白母曰仲博孝敬
 足以供養仲博滂弟也滂從龍舒君歸黃泉謝承書曰滂父顯惟大
 人割不忍之恩勿增感戚母曰汝今得與李杜齊名死亦何恨
 既有令名復求壽考可兼得乎滂拜受教顧謂其子曰吾欲使
 汝為惡則惡不可為使汝為善則我不為惡行路聞之莫不流
 涕時年三十三後漢書本傳

晉劉宏字和季沛國相人有幹略政事之才起家太子門大夫
 累遷甯朔將軍假節監幽州諸軍事甚有威惠寇盜屏跡以勳
 德兼茂封宣城公太安中張昌作亂轉使持節南蠻校尉荊州
 刺史討昌自方城至宛新野所向皆平進鎮南將軍都督荊州
 諸軍事遣軍討昌斬之時荆部守宰多闕宏請補選帝從之乃
 敘功銓德隨才補授甚為論者所稱於是勸課農桑寬刑省賦
 歲用有年百姓愛悅舊制峴方二山澤中不聽百姓捕魚宏下
 教曰禮名山大川不封與共其利今公私兼并百姓無復厝手
 地當何謂耶其速改此法益州刺史羅尚為李特所敗遣使告
 急請糧宏移書贍給州府綱紀以運道懸遠文武匱乏欲以米
 五千斛與之宏曰天下一家彼此無異遂以零陵米三萬斛給
 之論平張昌功應封次子一人縣侯上疏固讓許之進拜侍中

鎮南大將軍開府儀同三司惠帝時天下亂宏專督江漢威行南服前廣漢太守羊冉說以縱橫之事宏大怒斬之陳敏寇揚州引兵欲西上乃解南蠻以授蔣超統江夏太守陶侃等屯於夏口侃與敏同郡同歲舉吏有閒之者宏不疑之以侃爲前鋒督護委以討敏之任侃遣子及兄子爲質宏遣之曰賢叔征行君祖母年高便可歸也匹夫之交尙不負心何況大丈夫乎永興三年詔進號車騎將軍餘官如故宏每有興廢手書守相丁甯款密人皆感悅咸曰得劉公一紙書賢於十部從事及東海王越奉迎大駕宏遣劉盤率諸軍會之自以老疾將解州及校尉分授所部未及表上卒於襄陽士女嗟痛若喪所親宏卒司馬郭勸欲推成都王穎爲主宏子璠討勸斬之東海王越表贈宏新城郡公諡曰元

晉書本傳

唐李紳字公垂亳州譙人中書令敬元之曾孫也六歲而孤哀等成人母盧躬授之學於詩最有名葬母有烏銜芝墜轎車元和初擢進士第補國子助教去客金陵李錡辟掌書記錡寢不法紳數諫不入欲去不許會朝廷遣使召錡錡脅使者爲眾奏畱召紳作疏紳佯怖栗不能成字下筆輒塗去盡數紙錡罵之曰不憚死耶卽對曰得死爲幸怒而囚之錡誅乃免或欲以聞謝曰本激於義非市名也久之穆宗召爲右拾遺翰林學士累擢中書舍人遷御史中丞敬宗卽位爲李逢吉所陷貶端州司馬紳南逐歷封康閒湍瀨險澀惟乘漲流乃濟康州有媪龍祠紳以書禱俄而大漲後天子感悟得徙江州長史遷滁壽二州刺史霍山多虎擷茶者病之治機穽發民迹射不能止紳至盡去之虎不爲暴以太子賓客分司東都開成初爲河南尹河南

多惡少危帽散衣擊毬官道車馬不敢前紳治剛嚴皆望風避去遷宣武節度使大旱蝗不入境武宗卽位徙淮南召拜中書侍郎同中書門下平章事進尚書右僕射門下侍郎封趙郡公居位四年以足緩辭位以檢校右僕射平章事復節度淮南卒

贈太尉諡文肅

唐書本傳

宋包拯字希仁廬州合肥人始舉進士除大理評事出知建昌縣以父母老辭官歸養後數年親繼亡廬墓終喪猶徘徊不忍去久之赴調知天長縣徙知端州端產硯前守緣貢率取數十倍以遺權貴拯命製者才足貢數歸日不持一硯改監察御史使契丹契丹令典客謂拯曰雄州新開便門乃欲誘我叛人以刺疆事耶拯曰涿州亦嘗開門矣刺疆事何必開便門哉其人遂無以對歷三司戶部副使奏罷秦隴斜谷務造船材木及七

洲出賦河橋竹索數十萬契丹聚兵近塞邊郡稍警命往河北調發軍食拯以邢洺趙三州民田萬五千頃率用牧馬請悉以賦民從之經度解州鹽法一切通商除天章閣待制知諫院數論斥權倖大臣請罷一切內除曲恩又列上唐魏鄭公三疏願置之坐右以爲龜鑑又上言天子當明聽納辨朋黨惜人才不主先入之言凡七事朝廷多施行之除龍圖閣直學士河北都轉運使請罷河北屯兵分之河南諸郡借戍兵不可遽減請訓練義勇少給餼糧不報徙知瀛州揚州廬州池州江甯府召權知開封府遷右司郎中立朝剛毅貴戚宦官爲之斂手聞者皆憚之人以其笑比黃河清童稚婦女亦知其名呼曰包待制京師爲之語曰關節不到有閻羅包老舊制凡訟訴不得徑造庭下拯開正門使得至前陳曲直吏不敢欺中官勢族築園榭侵

惠民河以故河塞拯悉毀去遷諫議大夫權御史中丞奏乞豫建太子仁宗曰卿欲誰立對曰臣爲萬世計也陛下問欲誰立是疑臣也臣年近七十且無子非邀後福者帝喜曰徐當議之以樞密直學士權三司使凡諸筦庫供上物舊皆科率外郡拯爲置場和市民得無擾遷給事中拜樞密副使遷禮部侍郎辭不受尋以疾卒年六十四贈禮部尚書諡孝肅有奏議十五卷

宋史本傳

呂公著字晦叔壽州人幼嗜學父夷簡器異之登進士第通判潁州郡守歐陽修與爲講學之友判吏部南曹仁宗嘉其恬退英宗親政爲龍圖閣直學士方議追崇濮王或欲稱皇伯考公著曰此眞宗所以稱太祖豈可施於王及下詔稱親且班諱又言稱親則有二父之嫌王諱但可避於上前不應與七廟同諱

呂晦等坐論濮王去公著言屢紕言者何以風示天下不聽遂乞補外出知蔡州神宗立召爲翰林學士知銀臺司司馬光以論事罷中丞還經幄公著封還其命熙甯初知開封府時淫雨地震上疏請遠佞人二年爲御史中丞王安石方行青苗法公著極言之安石怒其深切帝使舉呂惠卿爲御史公著曰惠卿固有才然奸邪不可用安石愈怒誣以惡語出知潁州召還遷翰林學士承旨改端明殿學士知審官院未幾同知樞密院事有欲復肉刑者議取死囚試劓刑公著曰試之不死則肉刑遂行矣乃止夏人幽其主將大舉討之公著曰問罪之師當先擇帥苟未得人不如勿舉及兵興秦晉民力大困元豐五年以疾旬去位除資政殿學士定州安撫使俄永樂城陷帝臨朝歎曰邊民疲弊如此獨呂公著爲朕言之耳徙揚州加大學士將立

太子帝謂輔臣當以呂公著司馬光爲師傅哲宗卽位以侍讀還朝太皇太后遣迎問所欲言公著曰先帝本意以寬省民力爲先而建議者以變法侵民爲務誠得中正之士講求天下利病協力而爲之宜不難矣至則陳十事曰畏天愛民修身講學任賢納諫薄斂省刑去奢無逸又乞備置諫員以開言路拜尙書左丞門下侍郎元祐元年拜尙書右僕射兼中書侍郎與司馬光同心輔政推本先帝之志凡欲革而未定者一一舉行之民譴呼鼓舞咸以爲便光薨獨當國除吏皆一時之選科舉罷詞賦專用王安石經義公著始令參用古今諸儒之說且禁主司以老莊書命題復賢良方正科吐蕃首領鬼章青宜結久爲洮河患聞朝廷弭兵省戍陰與夏人謀取熙岷公著遣游師雄以便宜諭諸將不逾月生致於闕下帝出所書唐人詩分賜近

臣公著乃集所講書要語明白切於治道者凡百篇進之以爲聖學之助三年四月懇辭位拜司空同平章軍國事宋興以來宰相以三公平章軍事者四人公著與父居其二士豔其榮明年二月薨年七十二太后深痛閔之帝亦悲感親臨賜奠贈太師申國公諡曰正獻御書碑首曰純誠厚德始與王安石善安石兄事之安石博辯騁辭人莫敢抗公著獨以精識約言服之安石嘗曰疵吝每不自勝一詣長者卽廢然反後安石得志意其必助己而數以公議列其過失以故交情不終於講說尤精語約而理盡司馬光曰每聞晦叔講便覺己語爲煩其爲名流所敬如此

宋史本傳

朱熹字元晦一字仲晦徽州婺源人司勳吏部郎松之子也始就傳授以孝經一閱題其上曰不若是非人也嘗從羣兒戲沙

上獨端坐以指畫沙視之八卦也中紹興十八年進士第除泉州同安簿選邑秀民充弟子員日與講說聖賢修己治人之道禁女婦之爲僧道者孝宗卽位應詔上封事首言帝王之學必先格物致知以極夫事物之變則自然意誠心正而可以應天下之務次言修攘之計不時定者講和之說誤之次言四海利病係斯民之休戚斯民休戚係守令之賢否監司者守令之綱朝廷者監司之本也本原之地不可以不加重隆興元年復召人對其一言大學之道在乎格物以致其知其二言君父之讐不與共戴天湯思退洪适繼相皆主和議論不合歸屢召不起淳熙五年除知南康軍再辭不許至郡興利除害值歲不雨講求荒政多所全活閒詣郡學引進士子與之講論訪白鹿洞書院遺阯奏復其舊爲學規俾守之明年夏大旱詔條具民間利

病遂上疏言恤民之本在人君正心術以立紀綱不報旋錄救荒之勞除直祕閣會浙東大饑宰相王淮奏改提舉浙東常平茶鹽公事入對陳七事上爲動容始拜命卽移書他郡募米商蠲其征及至則客舟之米已輻輳日按行境內鉤訪民隱郡縣官吏憚其風采至自引去政有不便於民者悉釐革之上謂王淮曰朱某政事卻有可觀時鄭丙詆程氏之學以陰阻之遂乞奉祠周必大相除提點江西刑獄以疾辭不許遂行有要之於路以爲正心誠意之論上所厭聞戒之勿言答曰吾生平所學惟此四字豈可隱默以欺吾君乎及召對上曰浙東之事朕自知之今當處卿清要不復以州縣相煩也翼日除兵部郎官以足疾旬祠本部侍郎林栗以論易西銘不合力詆其僞栗雖坐黜亦允其辭除直寶文閣主管嵩山崇福宮投匭進封事言天

下之大本與今日之急務大本者陛下之心急務則輔翼太子
 選任大臣振舉綱紀變化風俗愛養民力修明軍政六者是也
 疏入上已就寢亟起秉燭讀之明日除主管太一宮兼崇政殿
 說書力辭除祕閣修撰奉外祠光宗卽位降詔獎諭除江東轉
 運副使改知漳州奏除屬縣無名之賦七百萬減經總制錢四
 百萬以俗未知禮采古喪葬嫁娶之儀命父老以教子弟禁男
 女聚僧廬爲傳經會史浩入見請收天下人望乃除祕閣修撰
 主管南京鴻慶宮再辭詔論撰之職以寵名儒乃拜命未幾差
 知潭州力辭有旨長沙巨屏得賢爲重遂行會洞獠擾屬郡論
 以禍福皆降之興學校明教化四方學者畢至甯宗卽位趙汝
 愚首薦除煥章閣待制講每以所講編次以進上亦開懷容
 納又奏勉上進德斥左右竊柄之失惕然以韓侂胄用事爲慮

旣屢爲上言又數以手書啟汝愚有防微杜漸之語汝愚方以
 其易制不以爲意慶元元年汝愚以誣逐權歸侂胄矣二年沈
 繼祖誣以十罪詔落職罷祠四年以年近七十申乞致仕五年
 依所請明年卒年七十一自登第五十年仕於外者九考立朝
 纔四十日此後僞學之禁甚嚴嘉泰初稍弛二年詔除華文閣
 待制與致仕恩澤諡曰文尋贈中大夫特贈寶謨閣直學士理
 宗寶慶二年贈太師追封信國公改徽國紹定末祕書郎李心
 傳乞與司馬光周敦頤邵雍張載程顥程頤列於從祀不報淳
 祐元年正月上視學手詔與周張二程同從祀孔子廟

宋史本傳

國朝康熙五十一年

特旨升列十哲之次

一統志

吳淵字道夫宣州人

補按舊志作宣城今依宋史吳柔勝傳更正又甯國縣志據宋史吳潛傳及一統志

作甯 國入祕閣修撰柔勝子也五歲喪母哀慕如成人嘉定七年舉進士調建德縣主簿時開化新置尉丞相史彌遠欲以處淵對曰甫得一官何敢躁進彌遠改容不復強丁父憂詔起復力辭不許復辭且貽書政府曰人道莫大於事親事親莫大於送死冒哀求榮大節掃地何以事君時丞相史嵩之方起復或曰語得無礙乎淵不顧服除知武陵縣改揚子入爲將作監再遷祕書丞出知平江府兼節制許浦水軍提點浙西刑獄衢盜起淵遣將士捕之殲其渠魁散其支黨以功累進右文殿修撰適政府欲用兵中原淵力陳其不可出知江州未幾邊事果如淵言改知鎮江府定防江軍之擾遷太府少卿進權工部侍郎以寶章閣直學士知太平州尋兼江東轉運使兩淮民流徙入境者四十餘萬慰撫而調濟之境內肅然升華文閣學士知隆興府

江西安撫使會歲大祲講行荒政全活者七十八萬九千餘人加敷文閣學士改知鎮江歲亦大祲因淵全活者又六十五萬八千餘人丁母憂服除進龍圖閣學士知江州尋爲沿江制置副使兼提舉南康軍兵甲公事節制蘄黃安慶屯田使湖南峒寇入江右境袁洪大震淵遣將調兵生擒其魁亂遂平遷兵部尚書知平江府兼浙西兩淮發運使歲又大祲因淵全活者四十二萬三千餘人以功進端明殿學士知建康府兼行宮畱守節制和州無爲軍安慶府兼三郡屯田使朝廷付淵以光豐蘄黃之事凡勅司空山燕家山金剛臺三大砦嵯峨山鷹山什子山等二十二小砦團丁壯置軍分立隊伍星聯碁布詔以淵興利除害所列二十五事究心軍民拜資政殿大學士封金陵侯賜袞繡堂忠勤樓大字進爵爲公改知甯國府累辭旬祠提舉

洞霄宮起拜觀文殿學士總領湖廣江西京西財賦湖北京西軍馬錢糧調兵二萬往援川蜀力戰於白河阻河玉泉寶祐五年正月朔以功拜參知政事越七日卒贈少師

宋史本傳

汪立信新安汪澈從孫也曾大父智從澈宣諭湖北道六安愛其山水遂家焉淳祐元年立信獻策招安慶劇賊胡興劉文亮等借補承信郎家窶甚吳淵守鎮江一見與語大奇之禮以上客試江東轉運司六年登進士第理宗見其狀貌雄偉顧侍臣曰此閩帥才也授烏江主簿歷通判建康府荆湖制置使趙葵辟充參議官葵去而馬光祖代之迎合賈似道以非理陷葵立信力爭之不聽遂投劾去景定元年知池州權知常州浙西提點刑獄即嘉興治所講求荒政改知江州又遷鎮江尋充湖南安撫使知潭州至官供帳之物悉置官庫所積錢連歲代納潭

民夏稅貧病及雨雪旱潦皆有給興學校變士習以潭爲湖湘重鎮勦威敵軍所募精銳數千人後來皆賴其用權兵部尚書荆湘安撫制置知江陵府時襄陽圍急立信上疏請益安陸屯兵不報乃移書似道謂爲今之計其策有三盡出內郡兵置之江干以實外禦距百里而屯屯有守將十屯爲府府有總督選宗室親王忠良有幹用大臣立爲統制分東西二府互相應援以爲聯絡之固成率然之勢爲上策久拘聘使無益於我徒使敵得以爲辭請禮而歸之許輸歲幣以緩師期邊遽稍休藩垣稍固生兵日增可戰可守爲中策二策果不行則銜璧輿櫬之禮請備以俟立信目微眇似道得書大怒抵之地詬曰瞎賊狂言敢爾中以危法廢斥之咸淳十年元兵大舉伐宋似道督諸軍出次江上起立信爲端明殿學士沿江置制使江淮招討使

就建康募兵受詔不辭卽日上道與似道遇蕪湖似道哭曰不用公言以至於此立信曰瞎賊今日更說一句不得似道問何向曰某去尋一片趙家地上死第要死得分明爾旣至建康則守兵悉潰四面皆北軍乃率所部至高郵欲控引淮漢以爲後圖已而聞似道師潰江漢守臣望風降遜歎曰吾今日猶得死於宋土也廼召賓佐與訣手爲表起居三宮夜分起步庭中慷慨悲歌扼吭而卒以光祿大夫致仕遺表聞贈太傅愛將金明以立信之喪歸葬丹陽元相巴延入建康或以立信二策告請戮其孥巴延歎息久之曰宋有是人有是言哉使果用我安得至此子麟不肯降崎嶇走閩以死

宋史本傳

明左光斗字遺直桐城人萬曆丁未進士除中書舍人選授御史巡視中城捕治吏部豪惡吏獲假印七十餘假官百餘輦下

震悚出理屯田言北人不知水利因條上三因十四議詔悉允行水利大興北人始知藝稻光宗崩李選侍據乾清宮迫皇長子封皇后光斗上言內廷乾清宮猶外廷皇極殿選侍旣非嫡母又非生母儼然尊居正宮將借撫養之名行專制之實武氏禍再見於今將有不忍言者時選侍欲專大權令廷臣箋奏先進乾清得光斗牋大怒將加嚴譴數召光斗光斗曰我天子法官非天子召不赴選侍益怒邀熹宗至乾清議之熹宗不肯往使取賤視之心以爲善趣擇日移宮光斗乃免當是時宮府危疑人情畏懼光斗與楊漣協心建議排闥奴扶冲主宸極獲正兩人力爲多朝野並稱爲楊左天啟初累擢左僉都御史是時正人咸居要地光斗與相得數爲危言覈論甄別流品而忌者浸不能容給事中傅樞疏劾光斗與汪文言比而爲姦光斗請

罷事得解楊漣劾魏忠賢光斗與其謀又與高攀龍共發崔呈秀贓私魏黨咸怒及忠賢逐趙南星高攀龍魏大中光斗憤甚草奏劾忠賢及魏廣微三十二斬罪忠賢詞知及其未上先二日假會推事與楊漣俱削籍羣小恨不已復構文言獄入光斗名遣使往逮父老子弟擁馬首號哭聲震原野至則下詔獄酷訊許顯純誣以受楊鎬熊廷弼賄坐贓二萬五日一追比與楊漣同日為獄卒所斃時五年七月二十六日也年五十一忠賢既誅贈光斗右都御史錄其一子再贈太子少保福王時追諡

忠毅明史本傳以上舊志

國朝李天馥字湘北合肥人順治戊戌進士授檢討康熙十一年遷司業累擢至內閣學士十六年雨澤愆期

特旨會同三法司詳鞫已結重案皆減等發落二十年擢戶部左侍郎

有以苞苴謁者拒之曰吾一日在部爾曹無望茲事之行也明年充會試副考官二十三年調吏部以激濁揚清為己任充

政治典訓副總裁二十七年擢工部尙書

上召總河靳輔巡撫于成龍面奏河工事宜兩人各執一說天馥會議

以下河海口當開高家堰重隄宜停謂成龍言是

上從之調刑兵二部疏薦知縣陸隴其彭鵬邵嗣堯居官有聲轉吏部

逐黠吏曹部一清三十一年授

武英殿大學士明年丁母憂

御書貞松二大字賜之兼書一幅曰儒者當學探本原行迪純茂循序

進德守己沖虛一言一動罔有不謹嘉謀嘉猷必以入告斯廣

譽翕然為周行之士出都後一日

上曰李天馥侍朕三十餘年未嘗有失三年易過此官不必補也葬廬

墓側手植松楸淚血沾漬墓門服闋起入閣視事充

平定朔漠方略總裁天馥老成清慎處心虛公嘗謂變法不如守法救

弊未必無弊奉行成憲不敢易尺寸乃所以報國也故其為政

持大體有古大臣風三十八年卒

賜祭葬諡文定

一統志 舊志 官績 新移

張英字敦復桐城人康熙丁未進士入翰林侍

講幄敷陳經義民生吏治悉心獻納知無不言

聖朝初設南書房俾每日侍直以資講論詞臣

賜第內城自此始及佐樞部掌邦禮恪慎清粹一時典章儀制

廟廷制誥之文多其手定洎登相位忠蓋純誠佐佑啟沃歷任三十餘

年未嘗一日離內直

聖祖稱其老成敬慎終始不渝有古大臣風嘗

命工寫像以賜生平多隱德外和內剛一私不染薦拔賢俊如不及未

嘗使其人知又廣義田以贍宗族肅家範以率子弟一門感勵

名節溫恭謙謹稱江左第一家風學問醇博所著有易書衷論

及存誠堂篤素堂文集康熙四十年冬

予告回籍四十七年卒於家年七十二

御祭恤葬逾恆制諡曰文端

世宗憲皇帝御極之初有甘盤舊學之思

贈太子太傅崇祀京城賢良祠復

賜祭於本籍又

御書祠宇扁額有忠純詒範師模如在之

哀恩禮之渥罕有倫比

一統志 江南 通志 舊志

方苞字靈皋桐城人上元籍康熙丙戌進士未

廷試聞母疾遽歸旋丁父憂五十年以戴名世案論斬蒙

恩赦宥隸旗籍

命直南書房蒙養齋恭校

御製樂律算法諸書

世宗登極加恩出旗籍假歸葬母還授左中允洊升內閣學士

命教習庶吉士充一統志總裁

高宗嗣位方欲追踐古禮行三年喪

詔羣臣議苞欲復古人以次變除之制具條其議禮部尙書魏廷珍上

之格不行乾隆元年

命選有明興

國朝制藝疏陳地丁四月完半之害請復舊制又言歲饑當令有司得發倉粟平糶勿拘常制又言河南祥符等五十州縣自改

折銀徵本色民因不支請應折徵官爲采買俱下部議行又疏

請凡遇水旱五六月卽當實報七月中卽核分數災重者動帑

金舉要工壯者以工代賑老弱計口授食則易周而可久又疏

陳食貨豐耗之故應飭官司督民樹畜令紳士籌開水利以裕

其源禁燒酒種菸禁米出洋以節其流二年遷禮部右侍郎請

矯除積習興起人才求

主上勤心以察依類以求按實積久以磨礱之信賞必罰以勸懲之語

尤切至四年以事落職

命在三禮館修書周官義疏成

上畱覽發刻七年以衰病乞解書局

賜侍講銜致仕歸十四年卒於家年八十二苞事親至孝學務篤實解

經之書莫不詳究其說經皆推衍程朱之緒尤致力於春秋三

禮其文嚴於義法非闡道翼教有關人倫風化不苟作至今言
古文者多宗之所著有周官辨周官集注周官析疑禮記析疑
喪禮或問儀禮析疑春秋通論春秋直解春秋比事目錄左傳
義法舉要及望溪文集又刪定管子荀子史記注補正離騷正
義刪定通志堂宋元經解而奉

命所纂之書不與焉

舊志儒林茲采年譜及先正事略增修並移

咸豐初年巡撫蔣文慶

題准祀鄉賢祠

祀典徵實 新增

曹振鏞字儷笙歙縣人尚書文垣子乾隆辛丑進士歷官至大
學士居相位凡二十二年卒年八十一其在乾隆時由編修超
擢侍講督學河南

高宗稱其聲名甚好嘉慶三年以詹事督學廣東父憂歸服除祖母歿
期年始來京補官

仁宗稱其孝以通政使充

實錄館總纂尋充副總裁十二年以工部尚書充正總裁

高宗純皇帝實錄告成加太子少保十八年以吏部尚書協辦大學士

甫五日補

體仁閣大學士

賞平定滑城功以振鏞職任綸扉晉太子太保自十九年七月至二十

五年七月

仁宗謁

陵六次秋獮木蘭五次皆

命留京辦事

宣宗御極簡任軍機大臣充

實錄館監修總裁官恭理喪儀道光元年

仁宗睿皇帝奉安禮成恭題

神主晉太子太傅三年

賜宴玉瀾堂繪像爲十五老臣之一

御賜詩句云絲綸佐朕彌恭謹抒忠獻替資劬勩四年

仁宗睿皇帝實錄告成

賞戴孔雀翎七年以喀什噶爾用兵襄贊機務夙夜勤勞

硃諭晉太子太師八年生擒首逆張格爾捷音至

硃諭晉加太傅賞用紫韁四月圖像

紫光閣

御製軍機大臣像贊并序曰西陲用兵諸臣夙夜在公盡心盡力與朕

同一憂勤而曹振鏞公正慎勤班聯領袖尤能殫心據實鉅細無遺

御製贊曰親政之初先進正人密勿之地心腹之臣問學淵博獻替精

醇克勤克慎首掌絲綸十一年

上五旬萬壽加恩臣工以振鏞並無處分

賞戴雙眼花翎十四年

宣宗恭謁

西陵

命留京辦事十五年正月以疾卒於位

諭曰大學士曹振鏞服官五十餘年歷事

三朝年躋八袞因疾請假派員存問優加慰勞詎意數日遽成長往頓

失腹心之臣不覺聲淚俱下悼惜難堪著加恩入祀賢良祠朕於本

月二十九日親臨賜奠又

諭曰朕親政之初見大學士曹振鏞人品端方學問優長特授爲軍機

大臣用資啟沃十四年餘靖恭正直歷久不渝雖身躋崇要小心謹

恪動循矩法從未稍蹈愆尤凡所陳奏均得大體老成持重懋著忠勤實朕股肱心膂之臣從前乾隆年間大學士劉統勳嘉慶年間大學士朱珪仰蒙

皇祖高宗純皇帝

皇考仁宗睿皇帝鑒其忠節

賜諡文正易名之典備極優隆曹振鏞實心任事體用兼優外貌訥然而獻替不避嫌怨朕深倚賴而人不知揆諸諡法實足以當正字而無愧著賜諡文正用副朕眷懷良輔寵錫嘉名至意並准其人祀賢良祠

命惠郡王前往賜奠靈柩起程回籍

命御前侍衛道慶前往奠醑到籍

賜祭葬如例初振鏞六十生日

仁宗御書綸閣延暉扁額謹以名其詩文曰綸閣延暉集又有話雲軒

詠史詩

史館鈔傳
行狀新修

重修安慶通志卷之七
聖天子棫樸官人之盛焉述人物志宦績傳

安慶府

吳陳修廬江松滋人偏將軍武之子也幼有父風年十九孫權召見拜別部司馬授兵五百人時諸將新兵多有逃叛而修撫循皆得其意不失一人權奇之拜為校尉後追錄功臣之後封都亭侯為解煩督

三國志本傳

陳表字文奧武之庶子修之弟也少知名與諸葛恪等並侍東宮徙太子中庶子拜翼正都尉兄修亡後表母不肯事修母表勸以大義二母感悟雍穆如初表以父死敵場求用為將領兵五百人傾意結納士皆愛附無難壯士施明盜官物考掠不承權以付表表以誠相感明遂首服且保任之明得不誅後明感恩卒為善士遷無難右部督封都亭侯以繼舊爵表請讓於修

子延不許領新安都尉料取所賜復入以充部伍在官三年廣開降納得兵萬餘人鄱陽民吳遽為亂表便越境赴討遽敗遂降拜偏將軍進封都鄉侯家財盡以養士死之日妻子露立太子登為起屋宅子敖年十七拜別部司馬敖卒修子延復為司

馬代敖延子永將軍封侯

三國志陳武傳

宋王罕字師言舒州人知宜興縣縣多湖田歲訴水輕重失其平罕躬至田處列高下為圖明年訴牒至按圖示之眾皆服范仲淹在潤奏下其式於諸道累遷戶部判官出為廣東轉運使儂智高入寇罕行部在潮遂還惠州簡卒三千方舟建旗順流而下將至廣悉眾登岸營於南門智高見有備解去徙知潭州為政務適人情不加威罰有狂婦訴事出言無章卻之則勃罵前守每叱逐之罕獨委曲徐問乃夫亡而婦無子妾有子者據

其家而逐婦因憤恚發狂罕為治其妾反其資婦遂愈郡人傳

為神明徙知明州以光祿卿卒年八十 宋史王珪傳

王琪字君玉罕從子也兒童時已能為歌詩起進士調江都主

簿上時務十二事仁宗嘉之除館閣校勘集賢校理帝宴太清

樓命作山水石歌琪獨蒙褒賞詔通判舒州歲饑奏發廩救民

未報先賑以公租守不聽琪挺身任之歷兩浙淮南轉運使修

起居注知制誥久之以龍圖閣待制知潤州轉運使徙知江甯

府多火災或託以鬼神人不敢救琪召廂邏作賞捕之法得姦

人誅之火患遂熄復知制誥加樞密直學士知鄧州徙揚州入

判太常寺又出知杭州揚州潤州以禮部侍郎致仕卒琪性孤

介不與時合數歷東南名鎮政尚簡靜葬於真州詔真揚二州

發卒護其窆蓋異數也 宋史王珪傳

張漢卿桐城人監興國軍筦庫與太守論事不合即和歸去來

辭歸隱三十年後趙汝愚特薦之 萬姓統譜

潘琛宿松人嗜學謁尹焞盡質所疑登紹興進士授廬州司戶

參軍蒞事勤敏升祁門丞教崇禮讓士民化之 江南通志 安慶府志

李安仁安慶府人慶元中為寶豐令軫恤民隱作興土類開渠

以興水利三年之間致民富庶百弛具舉有能聲 一統志河 南名宦

元虞執中字伯權望江人至元間進士授將仕郎居官恪謹公

事無滯山南憲府多獎進之 江南通志

明吳善桐城人洪武初官廣平知府上御下嚴善恪修其職帝

悅之惠施百姓政聲焯焯云 江南舊志

黃敏字宗學桐城人洪武初歷兵部員外郎奏罷糧運不便者

數事以忤旨左遷上林監丞升長蘆鹽運副使鹽弊肅清有奸

奄私販以事誣敏謫戍興州廷臣交薦復遷工部虞衡司擢廣西按察副使所至威惠並茂有古憲臣風江南通志

錢時字時中桐城舉人官刑部主事執法不阿李善長坐胡黨時白其冤上怒連坐死獄中江南通志

夏儒潛山人刑部主事發奸摘伏如神升福建僉事同邑劉誼

官湖廣道御史不避權貴左遷新淦縣丞興利革弊廉慎之行

始終如一安慶府志

葛崇潛山人洪武初徵為都察院檢校升山東道御史出按雲

貴有嚴明之聲凡讞獄必求其情疑獄不輕入時無冤民致仕

歸萬姓統譜

趙中字允中懷甯人洪武初知萬載縣時紅巾殘毀之後民轉

徙不遑城中不滿百戶中勞來安撫悉復縣郭置七坊廂縣廳

譙樓廟學皆其所建江西通志新増

吳普隆宿松人洪武初官福建左布政創設法制裁決庶務一

無所苟而事皆中理旬宣之政至今稱之以疾卒官江南通志

劉燾字尚載太湖人洪武閒以貢歷知柳州嘉興甯波西安長

沙彰德汀州諸府咸有政績為政寬厚不施鞭朴其在長沙有

不法者反覆勸諭人皆感化去之日父老擁泣爭挽其舟官終

雲南參政柳州長沙皆立祠祀之一統志湖南名宦

呂衡字仕平太湖人洪武閒以貢薦授監察御史遇事敢言奉

詔之陝西體察機務還奏稱旨巡按陝西風裁甚著貪墨皆望

風解綬去其孫讚字廷揚成化丙戌進士知新城縣剛介精敏

豪右斂跡升戶部主事江南通志安慶府志

羅彥章望江人洪武中知寶慶府有善政楚紀

劉瑩字仲瑀桐城人永樂癸未進士官御史歷永平廣平二郡
守為政平易人歌曰太守政平二郡皆甯江南通志

陳務本字立卿桐城人永樂閒官武昌同知除五蠹創十利又
捐資修黃鶴樓祿入為盡泊如也同邑許友進官御史以直聲

顯忤中貴指遂告歸江南舊通志 安慶府志

孫源潛山人永樂初官御史性剛介以言事忤旨出為重慶府
推官有政聲同邑方復字誠軒永樂壬辰進士入翰林侍宸翰

文采奕奕名重一時安慶府志

鄧恂宿松人永樂閒知葉縣公勤廉恕民戴之如父母以艱去
詣當道乞奪情者數百人服闋除內鄉地辟山險恂興學校平
獄訟勸輸將無一不盡其誠民咸德之子義以舉人任石首松
陽汝陽教諭訓誨有方致仕家居以風教自任安慶府志

饒政字文質望江人永樂乙未進士運糧江西既竣役同事十

三人分別授御史僉事政上章請授教職詔可先後四任學博

凡二十年所造就皆一時名臣其在德安教有成規雖祁寒盛

暑不輟一統志湖 北名宦

裘賢安慶人宣德五年官潮州通判為政公勤愛民如子公退

則杜門以絕私謁嘗出勸農釋冠帶執農具以耕其妻饑之比

年大熟人皆以為勸農所致後卒於官士民哀之廣東通志 新增

凌昌嶺松人官江西布政司理問詳讞疑獄出人意料擢御史

剛正不阿歷大理寺副明慎剖決獄無留滯致仕歸家居十餘

年未嘗一至公門安慶府志

吳昇字亨晦懷甯人宣德癸丑進士擢工科給事中遇事敢言

正統時廷議郡縣守令用大臣薦昇謂受官公朝拜恩私室不

可又議大臣舉御史昇謂御史既被大臣舉則大臣有不法御
史恐不肯背私恩而抗公言咸奏止之聞浙礦徒為亂勢甚熾
擢昇浙江參議督兵往緝至則捕斬渠魁撲其黨廉失機都指
揮以下數人奏置之法眾乃股栗不二載賊屏息後致仕歸統
志

程啟字太和桐城舉人官磁州同知時蝗蝻大發啟潛禱於神
忽禿鶯飛集啄蝗殆盡改滄州值旱啟禱五龍井有白魚五出
見兩大注歲大稔民立五龍廟肖像祀之江南通志

畢麟字文祥太湖歲貢官新樂訓導邊寇犯境有司竄匿麟率
士民立寨禦之升知阜平縣有能聲安慶府志

謝佑字廷佐桐城人正統丙辰進士歷任部曹奉敕督山西邊
儲接濟大同宣府天順戊寅升山西右布政凡所設施務使民

沾實惠致仕歸臨卒母喪未終遺言衰經為斂死不忘親也山西通志

江南通志

錢道甯望江人正統間以貢官福建順昌知縣造舟梁雙峯驛
前以濟民時巨寇鄧茂七來攻道甯率士民保境屢戰卻賊當
道上其功命未下已先卒邑人立廟祀之福建通志

何永康字伯徵望江選貢歷官新建縣邑苦旱永康勘度地勢
築隄堵水歲獲豐登民懷其德建祠祀之安慶府志

程翰字鵬舉望江人正統間官湖廣會同知縣在任六年百廢
具舉峒苗不靖翰率民兵討平之奏績於朝敕賜六品俸卒於
官民立像祀之湖南通志

韓隆字德崇桐城人景泰間官永安知縣邑患虎隆禱於神虎
遂去永安初置隆盡心民事築城建學公署壇壝一一創作辨

疑獄嚴治盜賊民咸德焉秩滿百姓乞畱復任至今祠祀之建福

通志 安慶府志李暹宿松人官御史正色立朝羣小側目同邑萬鍾官湖廣布

政司都事從征苗峒有功安慶府志

姚旭字景陽桐城人景泰辛未進士官刑部給事中敷奏詳明

直聲大著謫判鄭州清慎自勵擢南安知府盡心民事尤以學

校為先雨暘愆期有禱輒應地產嘉禾民歌頌之官終雲南參

政江南通志王相字廷相桐城舉人官兗州府通判董馬政馬大蕃息致政

歸陳獻章為桐鄉深處記以贈之陳白沙集

章綸桐城人景泰中以給事中謫應州判擢升本州洞達治理

案無畱牘明練仁恕有功地方歷官參政山西通志

戴貴潛山人景泰閒知四川井研縣井研素稱難治貴以廉介

特稱致仕歸足跡不履公府安慶府志

方佑字廷輔桐城人天順丁丑進士擢御史巡按畿輔錦衣官

校憚其風裁為斂戢有盜殺縣簿弗獲佑以計襲而誅之移巡

蘇浙鹽政一洗宿弊再按廣西蠻逼桂林城中兵少佑令兵出

東門入南門質甲易械如是數四蠻相顧錯愕遂巡撫吳楨

隱匿軍情佑劾罷之風采益著成化初以忤申貴廷杖終桂林

知府一統志黃憲字景章桐城人天順丁丑進士知登州登治瀕海收受山

東各處糧草轉給遼陽吏胥因緣為奸憲革其弊諸郡頌之安慶府志

蕭珍字廷玉桐城人官易州馬政判官牧地有占於豪右者清

還馬戶馬大蕃息上官賢之

安慶府志

葉華字廷輝懷甯人天順丁丑進士官山東沂州知州沂苦逋

賦疲於轉輸華區畫得宜民賴其惠武弁侵暴抗疏裁抑以勞

卒官民立祠祀之

安慶府志

邱甯字士安桐城人天順閒為鎮南衛經歷衛有兩山舊產磬

歲賦二萬有奇後磬盡民市別郡以償甯繕疏奏免邑人德之

安慶府志

王道字懿德潛山舉人官杭州通判廉恪敏斷威惠並行以事

忤直指使者挂冠歸直指檢其舟中惟敝篋盛書數卷乃慚謝

家居二十年著書講學足跡不入公門有盜入其廬曰吾借炊

耳知公廉吏無他求也

江南通志

劉永太湖人成化中官會同縣丞以廉能著升為令益勵廉隅

精聽斷久而不懈

湖南通志

李璉字純夫懷甯人成化己丑進士知蘭谿縣剛介有為治行

大著建景賢祠祀邑之鄉先生暨名宦又重建悅濟浮橋以便

利涉升太僕丞遷贛州知府水疫繼作璉拯之惟恐不及閩寇

犯境率民兵連擊敗之事平詔逮失事諸郡守璉僅以功免

一統

志江西名宦

浙江通志

王瑞字良璧望江人成化己丑進士授吏科給事中倜儻敢言

嘗於文華殿抗言內寵滋甚上震怒瑞無懼色湖廣江西撫按

官因災傷請免有司朝覲瑞言歲祲民困由有司不職正當加

罪乃為請畱則人才進退何由得辨是朝覲考察兩大典皆從

此廢帝即命吏部禁之晉都給事中疏言今倖門大開鬻販如

市乞天順冒功者一切革除斷自宸衷以存國體帝得疏意動

越三日貶李孜省凌中等四人秩奪黃謙錢通等九人官人心

快之瑞居諫垣十餘年遷湖廣右參議謝病歸卒

明史本傳

江宏濟字本深桐城人成化丙戌進士知清豐縣公廉明恕甚

得人心擢監察御史常云御史紀綱所係糾察在當人心論諫

在識大體尋按長蘆及雲南風裁凜然不避權貴以疾卒官筭

中惟敝衣數襲僚友醵金助之櫬始得歸

安慶府志

柯忠字汝節懷甯人成化乙未進士知鞏縣有善政擢監察御

史歷陝西按察司副使居官抗直敢言不肯俯仰時貴政譽赫

然

安慶府志

方向字與義桐城人成化辛丑進士擢南戶部給事中宏治初

疏劾大學士劉吉依附固寵徐溥巧圖進用尚書周洪謨善逢

迎而詆宦官陳祖生輩尤力竟為所陷下獄謫雲南多羅驛丞

後升安陸州居官廉儉遇事剛斷敏達再升瓊州知府歲旱徒

步禱雨立應瓊池產珠將歸僕私市一珠既渡海覺之索而投

之於海曰毋以而珠喪吾珠也

一統志湖北名宦江南通志

高昇字啟明潛山人以貢判廉州攝郡篆廉惠並至苗眾倡亂

昇單騎入其營諭以威德苗皆感泣就撫事聞錫銀牌以旌告

歸卒後敘平苗功贈奉議大夫

安慶府志

戴恩字天錫潛山人成化丁未進士授工部主事權稅蕪湖積

羨悉輸於公轉禮部郎出知桂林府釋誣盜之冤全活者十餘

命以忤逆瑾致仕歸卒年八十二

安慶府志

丁榮字宗仁懷甯人成化丁未進士官行人出使河南中道疾

劇同使勸之歸榮謝曰君命何可違竟卒於衛輝榮性孝友居

父喪寢苦塊者三年待異母弟恩勤有加

安慶府志

余順字天順懷甯人成化乙未進士知浙江安吉州政有便於民者攘臂為之略不辭難創學建廩鋤強恤貧以剛直忤當道

分省人物考 浙江通志

方印字與信桐城舉人知天台縣潔己愛民勸農興學闔邑利弊靡不與革未周歲教化大行卒於官囊僅八銖小民罷市相弔僚吏醵資為斂舊有司櫬不出中門父老號泣捧之而出咸

肖像建祠祀之

浙江通志

王琚字良珮望江人成化丁未進士知濰縣政尚廉平升濟甯州益以清慎著聞晉守大明府命方下卒於官

安慶府志

胡宏仁字德恢望江舉人知江西龍南縣為政嚴明不避權貴士民仰其清操有只飲龍江一口水之謠卒於官櫬歸士民攀

舟泣送

安慶府志

雷宗字希曾桐城人宏治壬戌進士知汝陽縣有善政擢監察御史正德時征霸州劇賊奉命監軍疏戎情振頽紀風裁凜然以功為同事所忌被誣逮問謫瀏陽典史轉知崞縣即告歸卒

年八十四

江南舊通志

丁楷字汝正懷甯人宏治己未進士知金谿縣以廉能著擢監察御史出按廣東風裁赫然論劾不避權貴卒於官藩臬往視其斂見囊橐蕭然咸歎息為真御史

江南舊通志

劉溥字公濟懷甯人宏治庚戌進士授翰林院檢討坐事除名以薦起歷麻城知縣麻多豪右溥開誠布公除強抑暴民樂其治而大猾皆病之然眾謂麻城有賢令自溥始

安慶府志

蕭世賢字若愚桐城人宏治乙丑進士官刑部郎中執法不撓豪強憚之治濠彬巨獄平反株連全活甚眾出守嘉興歲革羨

金千餘兩減織造樣絹三百餘匹立三館以造士治行第一擢

湖廣副使未至中道卒嘉人爲立遺愛碑一統志浙江名宦

李楫字濟之懷甯人宏治乙丑進士纂修孝廟實錄授南昌推

官以明允稱擢監察御史出按山西搜剔宿弊忤當道謫判沔

陽移泰和令從王守仁平逆濠歷遷貴州參議時芒部弗緝楫

贊臺臣往征之賊平錄功尋乞歸明史王守仁傳江南通志

段恢字汝寵懷甯舉人中乙科授裕州學正能以恩義結諸生

裕士子戴之如父恢以此愈自勵勤者誘惰者勸士風不然一

變安慶府志

王材字天成望江人宏治壬戌進士知龍游縣民有爭墓成大

獄材令各具志銘來及發石罪其不合者一邑驚服改昌平升

戶部主事終廣西平樂知府安慶府志

錢如京字公溥桐城人宏治壬戌進士正德中以御史按畿輔

后父慶陽伯夏儒乞清河地三千三百頃如京勘之言清河止

德府退地七百頃足以畀儒他皆民產不當畀詔遣中官史宣

崔通織造南方劉允迎佛烏斯藏皆與同官力諫累擢至都御

史巡撫保定等府歲饑請發內帑數萬緡賑之轉兵部侍郎提

督兩廣軍務所轄土官多相仇殺當事者利用兵以希功賞如

京不可疏請褫土官職許立功自贖晉刑部尙書卒贈太子少

保賜祭葬一統志萬姓統譜

李滄字元樸太湖人宏治壬戌進士任行人擢刑科給事中以

忤逆瑾轉浙江按察僉事浙東盜起滄督兵剿捕會有星變出

揚州分滄曰杭必有災令民間儲水以備已而杭城火得無患

調廣西按察使值撫江土猺與苗民讐殺滄討平之臺臣薦於

重刊... 卷之六
上命未下而溘卒

江南通志

余珊字德輝桐城人正德戊辰進士授行人擢御史乾清宮災疏陳弊政極指義子西僧之謬巡鹽長蘆疏陳竈丁及民戶困乞蠲逋寬政帝從之尋以發中官奸利事爲所誣下獄謫官嘉靖初擢江西僉事討平梅花峒賊遷四川副使應詔陳十漸疏反覆萬四千言語極愷切以艱歸士民祀之名宦服闋以故官蒞廣東終四川按察使

明史本傳

齊之鸞字瑞卿桐城人正德辛未進士改庶吉士授刑科給事中帝將置肆於京城西偏之鸞極言不可應州奏捷帝降敕稱總督軍務威武大將軍總兵官朱壽剿寇有功特加公爵舉朝大駭之鸞上疏切諫及將南巡復偕同官交章力諫不報更伏闕俟命乃止不行宸濠反張忠許泰等南征命之鸞從軍紀功

力白王守仁誣忠泰株引無辜多所開釋世宗時大計京官被中傷謫崇德丞屢遷甯夏僉事饑民採蓬子爲食爲取二封進於帝且以貽閣臣請賑歷河南山東副使召爲順天府丞未行盜發畱鎮撫尋擢河南按察使卒於官

明史本傳

潘洪桐城人正德閒以薦授山東按察司僉事居官明敏不避

權豪郡邑饋遺悉峻卻不受尋以忤要津罷歸

安慶府志

朱詔字栗菴潛山貢生任開封訓導武宗南幸詔上書請回鑾以安社稷正君位慰生靈帝覽曰真狂書生也升廣東清遠縣

教諭

安慶府志

章諍太湖舉人正德中知甯海州土寇方熾修城濬池演武備以待之寇薄城下焚東門指揮王瀛欲棄城走諍按劍叱之眾心遂定督兵奮擊賊遁去調全州和平無擾民皆安業尤得士

心轉廉州府同知山谷細民爭持雞米求見哭送者塞途入為

應天府治中卒一統志山東名
廣西通志

程亨字彥達懷甯人天順末官監察御史按河南持憲得體升

江西按察司僉事分巡南贛盜熾身撻鏊鎧奮擊搗其穴剿之

奉敕視學品士不爽致仕歸行李蕭然安慶府志

吳檄字用宣桐城人正德辛巳進士授襄陽推官決獄賑饑綽

有能聲遷兵部武選郎中有都督僉事姜夷奏邊功乞升職方

下武選議官檄曰法斬首二百上者升一級夷未滿八十當賞

不當升劉民譽者其父從世宗起興藩賜錦衣衛指揮希襲職

大司馬張纘欲與之檄不肯纘自為劄請詔不許檄亦以是外

補耿介之操始終如一江南通志

汪漢字淵之懷甯人嘉靖癸未進士授南戶部主事歷工部都

水郎中刷剔弊蠹節省浮費出知永州府猺獠構亂請兵征之

事將戢以疾歸歿後論功蒙鏹幣之賜安慶府志

楊春芳宿松人嘉靖丙戌進士授行人選御史巡按貴州十五

年平浪叛苗攻奪鎧口里春芳遣參將李佑等撫諭之賊執佑

等為質乞還土田官印春芳以聞命調軍三萬攻之不克復調

宣撫安萬銓合剿乃殲其酋王聰王佑等捷聞敘功賞賚有差

春芳有政事才後巡按陝西河南皆有功績明史貴州土司
傳宿松縣志

方克字惟力桐城人嘉靖丙戌進士歷知貴溪桐鄉二縣有賢

聲擢南監察御史中官邱得守備南京專恣不法請益額外兵

餉克抗疏劾之先是克仲父以劾中貴得罪人咸危之克曰吾

得紹武前人罪且甘之詔革兵餉謫得戍孝陵克性孝友撫姪

如子歷官苑馬寺少卿致仕安慶府志

徐桂字子芳潛山人嘉靖乙未進士歷官員外郎讞獄摘伏多所平反擢知鄖陽府有妖僧緣術為奸婦女佞佛入寺者輒墮其術中桂得其情親詣寺縛主僧勘問遂置之法焚其寺數十年不破之巫風一日盡革

江南通志

齊傑字士庸桐城人嘉靖辛丑進士官南刑部主事有同年生屬所知諷之將為之地傑曰丈夫拜爵公朝而乞恩私室乎拒不許出知贛州清廉勤慎克稱其職

安慶府志

盛汝謙字亨甫桐城人嘉靖辛丑進士授行人擢御史按關中歲饑民嘯聚為寇汝謙設糜賑之計擒倡亂者數人餘黨遂解遷光祿卿嚴嵩柄國汝謙守正不阿尋乞歸嵩敗出為南太僕卿駐滁州與滁士講學延師教其子弟之貧者擢操江僉都御史南京貢院號故用蘆葦捐俸修拓甃以甄轉戶部侍郎致仕

歸桐故無城倡議築之後流賊亂桐得保全汝謙之力也桐人

祀之

江南通志

阮鶚字應薦桐城人嘉靖甲辰進士歷官監察御史為浙江提學副使得人稱盛浙方苦倭寇撫官檄諸司畫地防守鶚分守武林門列營關外令士女分道入城得免追迫蹂躪之苦擢僉都御史巡撫浙江賊多方攻擊鶚隨機應之與胡宗憲相犄角以計縛其渠魁斬獲殆盡自是兩浙始得休息民思其德相與立祠

一統志浙江名宦明史胡宗憲傳

戴完字仲修桐城人嘉靖甲辰進士官戶部主事分司德州改刑部郎嚴嵩用事冀其私謁竟不往會張紳上疏劾嵩杖戍夜郎嵩偵其疏與完合草出補貴州僉事時盜賊屢發土官跋扈完杖之而以恩撫其子民皆畏服在任三月威德大著

江南通志

安慶府

蔣建字舒江懷甯舉人知建昌縣守官清慎遷饒州府同知饒有資審權要購求無已建一切禁罷清軍弭盜幹濟有聲饒民

德之立祠祀焉安慶府志

趙鈇字鼎卿桐城人嘉靖甲辰進士歷官給事中仇鸞占役軍卒鈇疏爭之勒士歸伍遷太僕寺少卿駐滁州苦旱鈇以身禱

兩立注又捐俸修書院學者興起累官僉都御史巡撫貴州值土舍韓旬攫司印糾黨稱兵三省騷動鈇督總兵等官會剿為

黔奏便宜六事皆議行焉又教民引水為田黔知水耕自鈇始江南通志

程倫字秉彝太湖舉人知開化縣存心正大民無私謁屏除奸弊修舉廢墜尤加意學校治行為東浙先浙江通志

方舟字雙桐太湖人以貢判兗州有賢聲魯藩重之稱先生而

不名治河有功賜銀幣同邑彭楫字平川以貢官汝甯教授清

望著聞署鄢陵令有惠政安慶府志

雷汧太湖貢生知景甯縣常祿外不妄取一物歷官三載積俸百餘金悉為其邑置田以養老者同邑劉綱字克用以貢官建

甯推官亦以明威稱安慶府志

宋鏞字廷器太湖舉人官彰德通判外艱歸服除補襄陽催科不擾屢署州縣事吏民懷之子大章字堯音亦以舉人知永福

縣有廉能聲奉委卒於建甯行笥蕭然當道厚為之賻安慶府志

於惟一字德夫懷甯人嘉靖癸丑進士官南工部主事巡視至水關上所寵方士陶真人欲夜從關出惟一繫其舟吳時來參

巖嵩被謫出都惟一祖餞泣別嵩銜之出守太原歲饑請賑不待報可徑發倉廩全活甚多擢陝西副使去之日民遮道泣送

一統志山西名宦

金燕字尙賓潛山人嘉靖癸丑進士知桐鄉縣時海寇猖獗桐鄉濱海無城燕即日營築城完而寇至環攻四十餘日寇遜設奇追殲之擢禮科給事中嚴嵩柄國燕疏詆其奸謫判彝陵後為尙寶丞

浙江通志

林有望字末軒桐城人嘉靖癸丑進士歷官四川兵備時嚴嵩擅權抗疏者三遂乞歸瀘州有羨餘銀十萬兩還貯庫內歸之日囊無餘資

安慶府志

吳宗周字文甫懷甯人嘉靖丙辰進士授黃州推官執法平允方士陶仲文以左道蠱上大吏皆嚴事之宗周不為禮且拒其請遷漢陽值景王之國下令稅民田宗周持不可上書悟王事得寢以疾歸起戶部主事拜命而卒黃人祀之學漢陽人肖像

祀焉江南舊通志

吳一介字元石桐城人嘉靖丙辰進士知光州光胥吏多貴家奴善持短長一介至無敢翫法者擢屯田員外郎修洪應樂城二殿造景王陵城廣渠門諸中人所奇貨視者罔敢濫冒擢江西副使備兵湖西會廣東峒賊卞豹等屠電白移節監南越軍破擒豹降其卒數萬進河南右布政使

江南舊通志

阮自嵩字思竹桐城人嘉靖丙辰進士官刑部執法不徇屢觸權要嚴嵩父子銜之謫判沔陽以官銀抵逋負脫二百餘人於獄景藩闖豎侵奪民田嵩繩以法致干參奏世宗原其無罪再判濮州均治河苦役小民戴之後復忤當軸以滄州守歸

江南通志

張科字子漸太湖人嘉靖辛丑進士授刑部主事豁達不立崖岸歷官刑部郎居官十載清白如一日

安慶府志

吳自峒字石蘭檄之子也嘉靖壬戌進士授行人以清望選翰林待詔充裕王講官正色開陳多所裨益穆宗即位以青宮舊恩攝尙寶卿歷太常寺卿自峒素與張居正善及居正秉政無一字相通轉南右通政旋告歸江南通志

趙書字同文桐城人嘉靖末以歲貢爲平湖教諭勤於課士諸生貧者典衣周之嘗作明倫十二事以爲訓學使者聞而褒賚卽以所賚鑄鼎學宮爲銘以見志云浙江通志

李彥字龍陽望江舉人官台州通判歲饑典賑全活數萬人窮民鬻妻輸稅彥爲贖還之有以孝聞者三式其廬擢漢中守鳳邑賦失均彥履畝圭度除荒糧五百石有奇漢沔諸水可資農彥爲修堰導郡城外四十里古溝民用大穰江南通志 安慶府志
程光甸字子極太湖人嘉靖己未進士知進賢縣歲旱民饑光

甸移家穀千石賑之轉工部主事士民思之請祀名宦江南通志

石廩字綱齋宿松人官山東德平簿有政聲委監三州二十四縣稅悉辦理遷廣東按察司都事承推疑獄多所平反升安遠知縣地鄰甌越化頑梗調難民表幽節舉逸行賑凶荒以蠶直解組歸邑人祀之名宦安慶府志

何思鼇字子極桐城人以貢知棲霞縣縣爲海墻瘠地賦恆不及額思鼇勸農予耕具免其口賦所輸視曩數倍富民誣殺人吏謂宜遠嫌竟奏當城且倭震於鄰大吏下防禦十策費且擾力持不可邑亦安堵解組歸民擁哭幾不得前以子如寵貴贈戶部尙書武英殿大學士安慶府志

周點字與吾望江舉人知浦江縣多惠政士歌民服作祠祀之

江南通志 安慶府志

吳肇東字敬堂太湖人隆慶戊辰進士授戶部主事出榷臨清鈔關有贏金一萬三千悉輸入庫出知桂林府愛民如子猺獞頑梗者咸稽顙庭下擢福建按察使將晉浙撫張居正奪情官聞者皆弔唁肇東獨不遣使往因謫長沙遂歸

江南通志安慶府志

重修安徽通志卷一百七十九

人物志

宦績二

安慶府

張涪字希古桐城人隆慶戊辰進士知永康縣素多姦黠健訟涪至判決如流吏民駭服凡斷訟片晷分析鄉民裹飯一包即可了事因呼為張一包又謂其敏如包拯也巨盜盧十八剽庫金十餘年不獲御史以屬涪涪刻期三月必得盜及擒十八報御史僅兩月耳民有睚眦嫌輒以人命訟涪驗無實即坐之自是無誣訟者歲旱嚴禁劫奪有奪五斗米者涪佯取死囚杖殺之而榜其罪曰是劫米者眾皆懾服累官浙江副使時議散浙東召募兵兵皆洵涪請汰其老弱留其壯勇則可免亂從

之遂定官終陝西布政明史本傳

王嘉柔字惟則潛山人隆慶辛未進士知從化縣地僻南徼惟

埋自雄小民荼苦罔告嘉柔撫字惟勤時劇盜萬尙興倡亂地

方搖動嘉柔設計擒之民德焉以炎方勞瘁卒官江南舊志

劉尙志字士行懷甯人隆慶辛未進士知歸善縣再補山陰兩

邑有神君慈母之稱以薦入諫垣張居正柄國繩下嚴尙志上

緩刑一疏鄒元標以劾奪情獲罪抗疏救之尙志本出張之門

不顧也歷江西少參浙江海道選將練兵爲防倭計甚悉遷福

建觀察轉山東左布政致仕歸尙志性孝葬父躬壘負石墓木

生連理人稱孝感江南通志

韓棟字遡高懷甯舉人知江夏縣簡素不媚上官張居正甚重

之臺司因而延譽張公子省試出有陳臬者爲張宴於黃鶴樓

有籐坐三主辦者貸於紳家公子登而屢顧之陳使人告棟令

買其全以獻棟不應陳自出重資強棟轉乞之棟即日解冠上

官皆留之不得江南通志

吳僖字士悅桐城人以貢知寶慶縣清潔自守令譽矚然歸使

擔竹簾過太守見之問何物傾之僅檀香棹數升守爲歎息久

之安慶府志

吳承恩字本賜桐城選貢知河陰縣黃河南徙民患之承恩禱

於神河忽北去四十里令民於其墮築隄植柳數十萬耕牧其

中遂成沃土後大饑民剝柳膚爲食曰此吳公活我柳也遷判

潞南父老攜錢爲贖承恩曰昔劉寵受民一錢吾不逮劉乃取

二錢受之安慶府志

韓選字惟賢桐城舉人官定州知州政務利民不避權勢畫奇

捕盜民賴以安

安慶府志

吳江字元濯宿松人萬曆七年知崇義縣開狗腳嶺路建朝天關修學宮御史陳炯記之

江西通志
新增

盛世承字以烈桐城人萬曆丁丑進士以部郎出為按察司副使備兵大同時邊事旁午世承馭以鎮靜威信所至西人懾服轉陝西右布政蘭州機戶疲於貢絨世承力蘇之調四川左布政會有事於播播平又為善後策蜀人賴之病免再起以原官備兵陝西按部墾河灘荒地千餘頃為秦中世利後為光祿卿以璫禍削職崇禎初起原官卒年八十八

江南通志

劉坤字擇華懷甯舉人官荊州推官風裁凜然有溫御史之稱後以議江陵奪情為所訐遂告歸

安慶府志

盛世翼桐城進士萬曆中知樂安縣戊子歲大饑首捐俸賑之

親至各鄉勸義得助千石者六家數百石者無算民賴以生修學均徭一清如水百姓至今思之

江西通志
新增

任可容字子賢懷甯人萬曆丁丑進士授中書舍人轉工部員外出知處州理民間利病如家事屬邑有以香葷進者中匿金以嘗之懲其解役遣去轉惠潮道兩屬皆海防重地嚴飭武備壁壘改觀遂一敗倭於碣石再敗倭於南澳有出海船三十餘隻稱係總督家人可容盡逮而置諸法南澳獲洋商五十四人總督誤以為賊力白其冤盡釋之尋轉本省鹽屯道以勞瘁卒於官

江南通志

容若玉字崑石懷甯人萬曆甲戌進士知晉州多善政創建書院進諸生講道論業燕趙之間彬彬有齊魯風焉升江西嶺北道值岑賊嘯聚廣中和平諸境聲言奔贛會撫道俱遷去玉以

一人攝藩司篆兼程假節鉞鎮之出兵大龍以保要害因檄嶺北共截其歸路遣謀者火其巢賊失據一戰縛之以積勞成疾

卒

江南舊志

葉隆光字朴齋懷甯人萬曆庚辰進士知閩縣愛民如子入爲吏部驗封主事轉員外郎本姓聶至是請復姓焉尋同萬國欽

鄒元標疏請早定國本削籍家居杜門光宗立詔求當日言事

諸臣而隆光已卒贈太僕寺少卿

江南通志 安慶府志

吳彥之懷甯人萬曆閒福建歸化主簿愛惜小民不輕鞭朴不

取紙牘有吳菩薩之稱

福建通志 新增

汪道亨字雲陽懷甯人萬曆癸未進士授戶部主事出守泉州

泉人稱爲恩父累遷廣東布政使平欽州賊有功入爲應天府

尹特疏請增科額尋以右副都御史巡撫宣府繕修亭障撫輯

邊人塞上無警卒贈兵部尚書

一統志

方大美字黃中桐城人萬曆丙戌進士授常德推官廉潔愛民

政多卓異擢御史巡按江西抗稅瑞飭吏治尤加意士風造就

甚眾轉按河南中州大旱捐俸賑荒全活萬人終太僕寺卿

一統志

徐堯莘字賓嶽潛山人萬曆丙戌進士由戶部主事出知永州

鞭朴不施郡中大化歷荊州知府中官陳奉開礦沙市掘冢瀝

室道路以目莘約其騶從不得逞大帥劉綖征播調兵數省途

出於荆民爭避之莘爲經紀信宿地民獲安堵神宗嘉其勞賜

以銀卮歷廣東按察使廣西布政使司

一統志

楊材字遜生懷甯人萬曆己丑進士知漳浦縣歲歉親核貧民

給其食凡不便於民者力請蠲之漳民訟曲者多食斷腸草乃

令不直者許焚草以代鉤金民多全活入為戶部主事給散京城各衛軍餉秉公無私遷吏部考功以執法忤當軸遂歸光宗立起太常卿轉左通政

福建通志 江南通志

吳用先字體中桐城人萬曆壬辰進士知臨川縣均賦便民民懷其德擢戶部主事歷官浙江左右布政晉都御史撫蜀時播酋亂大將劉綎以議餉未進用先躬帥師先之督綎等合戰戮力剿撫數月蕩平尋謝病上憫其勞特賜考績予告家居八年起少司空改樞貳總督薊州建防禦十策殫力籌畫會瑞禍起致政歸

江南通志 安慶府志

金忠士字麗陽宿松人萬曆壬辰進士知樂平縣舊志英敏有德威治務整大綱不苟繁瑣建麗陽書院修舉廢墜建置橋梁江西通志擢御史劾奸弁袁守時中貴邢隆立寢徵稅銀一十五萬新增

江南民獲更生巡按貴州浙江河南三省定水西平路苗降恩南賑荒平獄招撫流移以劾潞王不法事忤旨出為福甯參議遷榆林副使會濟農索金幣犯邊忠士擊敗之擢僉都御史巡撫延綏奏行籌邊七議威名大著卒贈兵部右侍郎子星耀蔭錦衣同知魏瑞用事乞假歸崇禎時起官上止殺疏莫不傳頌

一統志

胡瓚字伯玉桐城人萬曆乙未進士授都水司主事分司南旺兼督泉閘駐濟甯泗水所注瓚修金口壩遏之河決黃堍運道堙阻瓚贊總理河漕劉東星濬賈魯河故道益治汶泗開泉數百引漕甚便又督修琉璃河橋三年橋成省費七萬擢江西左參政告歸

明史劉東星傳

何如寵字康侯桐城人萬曆戊戌進士由翰林歷祭酒至禮部

右侍郎因與左光斗同里友善奪職歸崇禎初起禮部尙書宗藩婚嫁例請於朝貧者爲部所稽白首不能完家室用如寵請嫁娶者六百餘人京師戒嚴桀黠者請以私財聚眾助軍朝議壯之如寵方言不可帝偵之與如寵言合由是受知晉東閣大學士帝欲族袁崇煥以如寵申救免死者三百餘口稱病乞休疏九上乃允卒贈太保諡文端明史本傳

何如申字仲嘉如寵兄也與如寵同舉進士官戶部郎中督餉遼東有清操軍士請復畱二載終浙江右布政使明史何如寵傳

吳承顏字錦崖桐城人以明經謁選補建安丞凡陋例羨金一切謝卻攝崇建安壽甯三邑皆有廉聲乞休歸惟圖書數卷足不入城市安慶府志

江之湘字楚望桐城舉人司鐸江陰遷我嶺令有兩生以父仇

誣陷瘵獄立雪其冤地有白鶴潭民病涉之湘捐資填治水患以息至今稱江公潭邑祠祀之卒年八十五安慶府志

劉鈺字子堅懷甯舉人授紹興府判值湖藩以兵荒乏賑廷議浙省運銀濟之鈺承委部運既輸官餘耗千金歸盡還之省省使驚歎安慶府志

胡士奇字易礎桐城舉人知黃州多善政升姚安知府殫心教養會黔蜀交訐晝夜經畫竟保無虞以疾歸居官未久而惠政偉績所至人皆頌之安慶府志

馬孟禎字泰符桐城人萬曆戊戌進士知分宜縣廉惠得民秩滿將內召以徵賦不及四分被劾鐫秩民間其獲譴爭先輸納甫三日逋悉完授御史疏陳通壅蔽錄直臣決用舍恤民窮急邊餉五事怡神殿災陳時事可慮者三皆不省孟禎遇事敢言

其持議嘗與黨人相搢拄深為所忌遂出為廣東副使天啟初起太僕卿為魏黨所劾削籍崇禎時復官明史本傳

姚之蘭字汝芳桐城人萬曆辛丑進士知海澄縣開九都水利化斥鹵為膏腴居民德之名其地曰姚港升杭州知府訟無留獄接士以禮去之日郡人立德馨祠於吳山及西湖兩處又知汀州適朝議加餉乃搜府庫藏所餘者佐以贖羨新餉五千金完如額不以累民將超擢以母老乞養歸上嘉其急公愛民晉秩副使以榮其歸焉浙江通志江南通志

劉允昌字燕及桐城人萬曆甲辰進士知宜黃縣調臨川不畏強禦摘奸發伏如神遷廣濟多決疑獄他邑質成者畢聚江隄久圯改築之益廣且堅邑民素苦漕運為條陳上直指得減半折兌以疾卒官一統志湖北名宦

馬人龍字霖雨太湖人萬曆甲辰進士授戶部主事以犒邊奏績榷稅溥江賈人德之為立祠焉升黃州守調武昌轉本省督學副使校士公明眾論肅服以艱歸起補三關兵備轉桂林道苗猺大訖人龍修戰艘繕城郭禦之歷湖廣右布政引疾乞休歸江南通志

吳應琦字景韓桐城人萬曆甲辰進士擢御史巡按雲南值兩鎮並建貢金驛騷應琦奪鎮印於其子以還其父又力言滇方遠苦請免貢金之半諸明經應貢者苦萬里裹糧特疏免其廷對就試本省滇士尸祝之尋補浙江道按順永保河諸璫相戒勿犯累官南大理卿致仕歸年八十餘卒江南通志安慶府志

方學御字明卿桐城人以貢官廬州教授郡守聞其清操以疑獄屬之執法剖決不可干以私除知臨湘縣以德化民不任刑

罰尤崇獎學校延進賢俊庭論經史詢利弊卒於官貧無以斂

紳士致賻襄事安慶府志

姚之騏字渥源桐城人萬曆丁未進士知湘潭縣性剛直政務

利民尤加意學校勤於課士湘民有只喫湘潭一口水不染長

沙半點泥之謠卒於官貧無以斂監司王志遠為經紀其喪湖南通志

通志

倪應春字申之桐城人萬曆丁未進士知上杭縣擢御史敷陳

皆軍國重計光宗賓天引春秋不嘗藥正紅丸之罪李選侍移

宮羣議鼎沸乃上仁義兼盡之疏及楊漣去國復抗疏保畱一

時歎其正直晉太僕卿瑞禍起削奪同籍江南通志

任國楨字士彥懷甯人萬曆庚戌進士授戶部主事督淮安稅

務鈔溢五千悉解內帑遷知袁州袁故多盜楨集百姓訓戒有

犯者令其父兄自治期年萑苻無警擢山東兵備京師戒嚴振

旅入援上嘉其忠特簡楚臬以母老乞歸安慶府志

何早字白夫懷甯人萬曆癸丑進士知海鹽縣縣市肆有門攤

商稅派多失均核而差等之因大蘇行鹽票多至六千滯正引

早請減票二千鹽課以足擢御史巡視下江適瑞李明道督淮

漕建議民運早力陳其不便削籍去崇禎初銓部交薦奉有鯁

直端方之旨賜還里浙江通志 江南通志

方大鉉字君節桐城人萬曆癸丑進士授刑部主事張差獄起

同官王之案欲窮治其事大鉉泣而止之保全甚眾以艱歸廬

墓三年起補戶部卒於官安慶府志

吳善謙字伯亨桐城舉人任台州推官俗佻難治兵以餉不時

給每羣譟謙既任事兵民安輯崇禎初擢御史上求治方殷善

謙首贊實政上甚嘉之安慶府志

盛可藩字屏之桐城舉人授龍泉教諭升主事督運通州禁革

陋規又督運昌密二鎮邊糧如期報完以瘁成疾卒於官贈光

祿少卿安慶府志

齊琦名字越石桐城人萬曆癸丑進士授大理寺評事以明恕

稱典試蜀閩甄錄皆名士轉戶部清屯糧二萬餘出守紹興清

白自矢致仕歸安慶府志

黃文星字辰北潛山人萬曆癸丑進士知同安縣甫越月颶風

發民居幾盡文星經紀年餘盡復其廬舍調清豐治績益著擢

駕部郎以瘁卒官櫬歸行李蕭然江南通志

李載圃字東梧太湖人以貢授東平州同知人莫敢干以私治

聲大著委查各縣所至慚懾安慶府志

吉以升字南階太湖人以貢知浦江縣有善政民稱曰子路重

來弟以復守鄞州亦稱能吏時謂二難江南舊通志

陳所學字載揚太湖人以貢授鎮江教授升隆平知縣歷安甯

知州革火耗崇學校歲歉捐俸施粥全活甚多厝道殫立義館

惠政不可勝紀上官咸稱為清廉第一卒年八十餘江南舊通志

章以逢太湖舉人知淇縣仁惠有聲民頌為章母尋乞休卒邑

人祀之安慶府志

李廷柏字三望望江舉人授太安學正擢知平穀縣縣為邊徼

飭備安民戶夜不扃安慶府志

龍子甲字汝成望江人以明經任教職擢知濟陽縣縣苦馬政

歲耗萬金子甲釐其弊民始甦妖賊鄒勝作亂鄰邑無堅城獨

濟陽守禦有方得不破性至孝母徐氏年九十歿居喪猶孺子

泣一統志

石汝瑩字琇夫宿松舉人授沔陽知州載薪米赴任曰吾所飲楚水耳到任修葺學宮優士勤課民無冤獄吏不舞文有青天之譽卒於官祀名宦江南舊志

汪文偉字純符宿松舉人知崇德縣寬和廉明民尸祝之調靈邱致仕歸同邑楊可晉字麗明以貢授全椒學博勤於造士卒於官臨江酌送者數百人安慶府志

方大任字玉成桐城人萬曆丙辰進士知元城縣擢御史魏璫墳瑩越制特疏糾之削籍崇禎初召復故官升都御史巡關獨出關千里外與總督袁崇煥經畫方略巡撫順天出守通州賊圍城誓以死拒一子甫數齡大任作家書與之訣邏者得之以聞上嗟歎久之圍解遂得疾告歸江南通志
安慶府志

方孔炤字潛夫桐城人萬曆丙辰進士知嘉定州發奸如神以忤上官調福甯為建學宮開玉帶池入為職方郎忤崔呈秀削籍崇禎初起故官以艱歸定桐城民變還朝以右僉都御史巡撫湖廣擊賊李萬慶馬光玉羅汝才於承天八戰八捷時熊文燦納獻忠降處之穀城孔炤條上八議言主撫之誤已而賊果叛文燦乃檄孔炤防荆門當陽孔炤請專斷德黃守承天護獻陵會楊嗣昌代文燦令孔炤仍駐當陽惠王常潤疏言孔炤有來家河神通堡之捷陵寢得無虞請增秩久任意下部未奏而部將楊世恩羅安邦奉調剿竹山寇深入至香油坪而敗嗣昌伎其異已劾逮詔獄予以智伏闕訟冤議護陵寢功多減死成紹興復以薦起右僉都御史屯田山東河北馳至濟南而京師陷南都馬阮亂政歸隱十有餘年而終一統志
福建名宦
明史鄭崇儉傳

吳叔度字勿銘桐城人萬曆丙辰進士授工部主事權杭州南關杭人爲鐫權政上下篇以紀之尋守黃州黃梅盜起氛甚惡叔度曰此烏合易與耳單騎往諭卽解散後再入爲工部卒黃人思其德祀之蘇祠之傍

安慶府志

沈立義太湖人萬曆丙辰進士知樂清縣每至耕斂時輒弛征以紓民力俗尙厚隘至破產生女多不舉立義勸諭之風俗一變有戴生病不能娶出資助之擢戶部主事歷工部轉長沙守長沙轄地廣撫字催科兼得其理以勞卒官

浙江通志
安慶府志

何應奎字任城桐城人萬曆己未進士知吉水縣政尙廉平擢禮部主事歷吏部郎時銓政久壞應奎深心調劑疏冗滯杜苞苴爲時所稱

安慶府志

鄧士美字實卿桐城人以貢知靈山縣入境祭伏波廟有甯爲

保障毋爲繭絲之語政尙簡惠一意撫循引疾歸靈山如失慈父母卒年九十三

安慶府志

葉耀字太素桐城人以恩貢授武進訓導歷知文高縣清慎如寒素折獄多平反稱嶺南循吏第一卒年八十二

安慶府志

劉之賡字若颺桐城人以歲貢官蓬州知州署儀隴有惠政民德之嘗辨江右木商羅殷之冤爲出其罪後殷孫大任成進士人翰林造廬道謝人始知之

安慶府志

黃朝臣字惟敬潛山舉人官海州學正守廉其賢以征科相屬素稔民困悉裁羨餘守歸感其誠亦自裁其餘遷麻城知縣未赴卒

安慶府志

舒鵬字應舉望江人以明經官平湖縣丞署邑篆時值兵荒流移載道招集勸墾民安其業又捐俸修學多士懷之擢知南海

縣以外艱歸母老遂不出弟塗亦以明經判九江有惠政家居兄弟相師友並年近八十餘

安慶府志

孫繼陞字我揚桐城貢生萬厯間授海門訓導請開南關外石開旱歲引水入河潦歲洩水出海民利賴之又築利河鎮海隄期月工竣擢河南項城知縣賑水荒役丁壯濬河擊殺潁州銅陽城積寇殆盡威惠大著調山東鄆城擊敗宋賊尙營獻策於河院李若星討平之衰老乞休去官崇禎初以員外郎召不起

桐城縣志

齊心孝字君求桐城人天啟壬戌進士官編修與黃道周倪元

璐齊名

安慶府志

倪嘉善字瓊圃桐城人天啟壬戌進士崇禎時授檢討廷對疏論君德甚悉朝鮮擅廢其主命草檄討之遷國子司業上幸太

學命講泰卦充經筵日講官時國步艱難以憂勞成疾卒

安慶府志

姚孫渠字石嶺桐城人天啟壬戌進士知龍游縣地產竹樹採買為患力請停之乃蘇其賦商民相與立祠再補晉江瀕海為鹹潦所淤居民流離孫渠捐募糶穀以賑全活數萬擢御史章奏悉申時弊彈射不避權貴官至尙寶卿

江南通志

孫晉字魯齋桐城人天啟乙丑進士知南樂縣清驛釋繫戢豪賑饑調滑縣報最擢給事中首劾權相疏凡九上以忤溫體仁左遷大理寺正特疏出劉宗周金光辰於獄宣督乏人上特簡之受命半載徵兵徵餉積勞成疾乞休歸明亡有薦之者辭不出

安慶府志

王揚基字爾抑潛山人天啟乙丑進士歷知錢塘東鄉進賢諸縣治績稱最遷工部主事以艱歸服除從少司馬督剿餉轉楚

驛鹽道以援漢陽有功晉楚撫闖賊陷承天左良玉引師東指
獻賊復連破蕪黃陷武昌揚基率罷卒數百從湖南循袁州繞
彭蠡至江州與良玉軍會涕泗誓師上諭恢復顯陵甲申春率
諸軍大舉循漢川而上聞京師陷以憂卒

安慶府志

左光先字三山桐城人光斗之弟也以舉人知建甯縣擢御史
巡按浙江任滿既出境適許都倡亂反東陽光先聞變疾返命
將擊之連收其所據四邑都退保紫微山紹興司理陳子龍欲
降之光先不可執而戮之福王立馬士英薦阮大鍼光先力爭
大鍼得志逮光先亂亟道阻乃止

明史左光斗傳
浙江通志

黃自泰字體白太湖舉人歷官主事奉差採銅常德不擾民不
病商升湖廣驛鹽道

江南舊志

趙璧字連城太湖舉人知平樂縣歲饑捐資貸賦民賴以安調

慶元循聲益著慶人立祠祀之升建甯同知清餉除盜有功將
題擢遂乞歸年八十九

安慶府志

方九思字心齋太湖貢生官四川布政司經歷署絲州興利除
害如謀子孫忘其為代庖也去任日父老子弟如失慈母乞養

歸

安慶府志

雷永祚字長卿太湖舉人官臨清北徐教諭訓迪有方司理餘
杭多所平反解組日行李蕭然同邑尹大勛字淡明以貢官濟
陽教諭日與諸生講學不輟人嚴事之

安慶府志

韓一光字麗陽懷甯人崇禎戊辰進士由行人授監察御史時
璫燄雖熄二三漏網者尙柄用光疏凡十上列其奸賄流寇猖
狂特疏爲皖預增兵餉當事者視爲不急俄賊兵犯境王師敗
績出按蜀悍宗大吏爲之凜然後擢大參治兵濟南爲舊劾吏

所誣罷歸里卒年八十二安慶府志

汪游龍字六御懷甯人崇禎辛未進士知靈山縣地接交阯蜚
戶黎人時煽為亂游龍練兵設餉民賴以安調番禺海寇劉香
老人犯當先決戰不避矢石香老就擒擢御史士民號泣遮擁
有隨舟數百里者按閩值黃道周以劾楊嗣昌被謫力疏救之
卒於官僚屬往斂惟做衣數襲而已江南通志

戴昶字無睢懷甯人崇禎辛未進士授工部主事詔修都城程
物量工如治家事皖苦兵燹上疏請蠲轉濟南道土寇李雲焚
掠無忌練兵堵截殲其渠魁寇平轉山西提學道卒於官安慶府志

汪國治字君酬桐城人崇禎辛未進士知閩縣愛民如子革火
耗免羨餘調揭陽海氛先熾嚴保伍勸農桑一邑帖然奏最擢
戶部主事督運通橋以功升郎中除山東兵備參議歲饑殫心

翰濟引疾歸時里中方有寇警即捐餉登陴為士民倡會幼子
遇賊害感痛卒安慶府志

汪大勛字庸廷宿松人以恩貢任龍游丞署開化篆凡應納贖
緩者以貧苦告即豁除之休致歸中途爨火不繼鄉居蕭然年
八十餘卒安慶府志

高宏量字心完宿松人以貢歷處州教授正士習培士氣處守
陰揭一士挾之取印堅不肯從守怒逕申之以無學篆遂寢處
士深德之初皖人任可容守處民立生祠祀之至是以宏量配
安慶府志

石尙貞字載素宿松人官膠州判累擢蒼梧令兩臺有疑獄悉
委代鞫以人覲卒於里安慶府志

光時亨字羽聖桐城人崇禎甲戌進士知榮昌縣治聲丕著擢

刑科給事中疏言有銓政始有人才有政事始有財用人傳誦之李明睿建議親征為南遷計時亨疏言平禍亂在安定人心今一城洶洶不為城守計皆明睿一言誤之京師陷時亨南歸馬士英謂其阻南遷殺之安慶府志

倪祚善字永錫桐城人以貢知永興縣洞寇猖獗繕甲厲兵寇不敢犯遷判岳州岳陽樓東有白煙一綫上沖霄漢三日不絕訛言城將災祚善肅禱請以身代煙即息補金華同知許都倡亂首犯金華祚善力為保障亂定誅其渠魁寬嚴得宜以功升

處州知府浙江通志 安慶府志

左光明字允之桐城人以選貢歷官武平知縣地疲瘠軍民雜處光明革羨恤獄解懸繩峯官田之累武民大蘇羣盜竊發置社倉練鄉兵建營橋為守禦計他如造士賑荒罷礦役毀妖樓

皆偉績解組歸年七十八卒安慶府志

顏渾字伯通懷甯人崇禎庚辰進士授吏部稽勳主事改文選主事澄敘流品門庭闐如嘗憤要津持銓司短長乃倣范仲淹百官圖將除授淺深分注小冊遇有屬託即發冊示之見者慚沮升員外郎告歸江南通志

宣國柱字若木懷甯人崇禎庚辰進士擢兵科給事中經國大務章十餘上皆允行然不避嫌怨卒以讒下獄詔再鞫始獲昭雪以母老乞歸江南通志

姚孫棐字戊生桐城人崇禎庚辰進士知蘭谿縣南米最為蘭困自邑達壩數千里力請改折蘭承賴之調東陽許都倡亂探城無兵突發陷城孫棐馳走深山招集義勇乘元旦賊懈掩擊之遂收復城池誅斬無算旋命家置火器戰具以守賊復來寇

手射卻之

蘭谿東陽縣志

璩伯崑字山甫桐城人以副貢知武甯縣邑西柯源洞居人出沒無常舊設銅鼓營以鎮之伯崑孚以誠信頑梗悉化又為均賦清畝定畫一之徵民食其利巨盜熊元化累捕不獲至是自首曰我不惜一死累賢侯也擢御史引疾乞歸

安慶府志

錢孔芳字含仲桐城人以明經授蕭山學博署邑篆夜夢持斧人跪乞命晨見一尸浮泮水池素與河通意漫流所入召匠合木為瘞視匠斧有血憶夢語執訊之即其所手刃一邑稱神明

安慶府志

方象賢字廣野桐城人以貢授黃州判督糧剿寇有功升高州府海防同知復以逐退狼寇功轉廣州府同知歷兵備副使

安慶府志

蔣臣字一个桐城人崇禎時舉賢良撰足國三議漕屯及鈔甚悉范景文倪元璐前後皆薦之授戶部司務明亡自經為人所救遂閒道歸史可法鎮淮為策淮上情形數事史欲以監軍薦固辭歸里鬱鬱而卒

安慶府志

陳文顯字微之太湖人崇禎甲戌進士知南城縣宗藩橫甚文顯以法繩之不敢逞艱歸起補雷州推官治獄平反雷人立祠祀焉擢工部主事道聞京師陷拊膺慟哭旋里隱居

國朝順治中累薦不起時年僅四十餘也著有率素齋詩文行世

安慶府志 舊志 隱逸新移

雷續祚字介公太湖人崇禎十三年帝思破格用人號庚辰特用續祚以舉人得刑部主事首劾楊嗣昌六大罪可斬鳳陽總督朱大典安慶巡撫鄭二陽河南巡撫高名衡山東巡撫王公

弼宜急易十五年備兵武德疏劾督師范志完縱兵淫掠召對
平臺侃侃直陳乃誅志完而合續祚還任尋以艱去福王立於
南京馬士英以續祚及周鑑會主立潞王議令朱統鏘劾姜曰
廣因及鑑續祚請悉置於理遂令逮治同賜自盡故事小臣無
賜自盡者以左良玉兵東下故阮大鍼輩急殺之明史姜曰廣傳

倪藻字華陽懷甯人以貢官蓬州判蓬民素黠藻孜孜迪之以
善駸多向化以勞卒官安慶府志

江夢鶴字懷天懷甯舉人署泰興教諭程士有方晉信州同知
時流寇擾攘按戚繼光練兵法勒部選材以儲可用屢署劇邑
故上饒玉山鉛山咸以威惠著聲然勵精官守卒以刷清漕弊
為貲郎所中遂決計歸同邑汪鉉字以玉以舉人署高淳教諭
多所造就後成崇禎癸未進士授行人江南舊通志安慶府志

王之慶字修祐望江人以貢知尤溪縣政成卓異因親老致仕
流寇披猖之慶糾集鄉人立社保聚既沒與左光斗雷續祚並
祀曰三賢祠江南通志

宋儒字文卿望江人官錦衣衛千戶典告密儒性廉惠死獄必
求其生囚故無藉臥輒僵死儒奏以牧象草藉之繫者缺食又
奏以無主盜贓食之遂定為例後鄰連不戒於火焚燬略盡儒
家獨存蓋陰德之報云江南通志

左國柱字碩人桐城人光斗長子光斗死璫禍國柱重繭數千
里具血疏伏闕號冤得昭雪復官國柱後以副貢令浙之武康
邑白糧久為屯丁侵攬勒索無休國柱力請官兌民困乍蘇如
出湯火至今頌之安慶府志

周夢蓮字仲濂桐城人官平陽主簿鳳浦江埭歲以潮嚙傾圮

大為農患當道委夢蓮往治之躬督畚鍤堅患息後移金鄉城當海口歲遭颶風將就圯夢蓮出獨智經畫板幹工役三月城成吏之能而敏者稱首焉

桐城縣志

方可選字贊明望江人以明經授壽昌學博兩署邑篆邑多山寇出沒民人駭散可選招徠撫輯申保甲以相糾覈招鄉勇立團聚以相守望奸宄無所容士民復業以病乞休士民泣送至

境

安慶府志

龍應鼎字禹九望江人官海門學博時總兵官鄭芝龍重兵壓城勒輸金二萬令與尉俱逃應鼎獨入鄭營長揖不拜芝龍奇之畱飲盡歡旋撤師去沿海數百里賴之以安以母老乞養歸應鼎性孝少嘗割股愈父疾鄉饑設粥作賑鬻產糴米以為之倡全活者無算

一統志
安慶府志

吳德操字鑑在桐城人以黃道周薦授福建長汀知縣入粵以瞿式耜薦擢監察御史會劉承允擅柄挾桂王之武岡德操爭之承允怒逼王予杖再起御史至大理寺丞轉徙艱難備嘗荼苦而直節益著遂卒於粵

桐城縣志

昔而直... 之亦... 擊友... 吳...

重修安徽通志卷一百八十九

人物志

宦績三

安慶府

國朝方拱乾字肅之桐城人前明崇禎戊辰進士官庶常歷升少詹事充東宮講官經筵日講順治初江督馬國柱薦起補宏文館學士尋除少詹事會上疏數千言多切時務與修大訓等書為忌者所中蒙

恩賜歸

府志

張秉貞字元之桐城人前明崇禎辛未進士歷官蘄黃江防道時流賊踞楚中躬擐甲胄晝夜視師賊不敢逼內召陛見疏陳戶曹七事擢順甯道平五馬賊以艱歸服除起都御史巡撫浙

江知天命有歸安戢人民部署版籍以待

王師浙西傳檄而定兵民安堵授禮部儀制郎歷官刑部尙書治獄
持平解枉釋滯改兵部運籌軍國以勤勞卒於官諡僖和

安慶府志

馬之瑛字正誼桐城人前明崇禎庚辰進士知陽江縣以廉卓
徵順治初總督馬國柱薦出佐長蘆鹺幕遷知定陶縣值李化
鯨陷城後民物凋弊之瑛招集拊循漸復其舊邑以偽印事株
連數百委曲移訊無辜盡釋又盡革陋例均濱河夫柳之役陶
地多豪右侵占之瑛丈實匿地二千餘頃豁免空糧爲陶永利
擢兵曹主政以勞卒官陶民至今思之一統志山東名宦

劉餘謨字良弼懷甯人前明崇禎癸未進士順治初授刑科給
諫凡經國要務疏屢千言以病乞歸

江南舊通志

張清議字君賀懷甯人前明崇禎癸未進士順治初勘荒江上
又督鑄寶泉搜其利弊立有條法永以爲例尋備兵瀧水獐豸
反側乘風雨夜擊之一戰擒其渠魁量移川北西山寇發清議
總攝軍務崇朝滅賊民不知有兵引疾歸蜀人建祠祀之卒年
七十七子超方順治己丑進士知整屋縣有治聲

安慶府志

姚文然字若侯桐城人前明崇禎癸未進士授翰林明亡閉戶
自經以救甦順治初擢禮科給事中康熙中掌印工戶二垣銳
意建白彈劾不避權貴如疏請創設直隸晉豫總督彈秦撫委
用私人糾憲臣二十餘人之溺職而請寬大臣提解一疏尤爲
得體他如請免四川湖廣江西浙江江南五省採辦楠木之害
論朝審重囚之酌予勾除錢糧考成之分別開復皆關國計民
生擢左副都御史升刑部侍郎充會試總裁官得韓莢爲第一

升刑部尚書理冤清滯校閱爰書恆至夜午年衰有疾諸子諫之不聽嘗曰勿殺人於一時例殺人於萬世其可忽乎卒於官諡端恪雍正八年

詔祀賢良祠一統志

王大初字以介桐城人順治丁亥進士官翰林編修因病乞休家居九載起為江右參政督視漕務悉革陋弊停差下州邑而一紙慰諭通問僚屬藹然如家人而急輸恐後期會無愆公暇課士論文春風滿座時有冰鑑之目江南舊志程芳朝字其相桐城人順治丁亥榜眼授編修歷官太常寺卿視學畿輔絕去竿牘獎拔寒素奉使安南馳驅况瘁宣暢威德遠人爭賦詩送芳朝亦答和以為榮性嚴介不肯依附遂移疾歸江南舊志

歸江南舊志

方享咸字吉偶桐城人順治丁亥進士知獲鹿縣察奸戢盜有聲調麗水築好溪堰通濟堰田無旱潦利及鄰邑擢主事升郎中恤刑湖廣江西多所矜豁

世祖章皇帝召入禁內作書各一幅授陝西道御史未久罷歸安慶府志何采字敬輿桐城人文端如寵之孫以江甯籍成順治己丑進士由庶常歷侍讀文章翰墨為一時詞臣之冠

世祖章皇帝嘗比之蘇軾氣節高峻不諧於時以疾歸安慶府志潘士璜字鳴瑕桐城人順治己丑進士知東陽縣時寇氛未靖總兵馬進寶駐劄金華防弁攘奪民甚苦之士璜力請當道連罷數員民賴以安安慶府志

吳道觀號達田桐城人順治己丑進士知商水縣性本慈愛政尚寬平教士勸農一務節儉禁民無得滄女邑產女呼為桐女

所以報也以最行取不果反中考功議罷歸安慶府志
彭爟字孔哲桐城人順治己丑進士時鼎革方新中式者皆擢
用爟氣度從容狀貌魁傑

特簡粵西參議授節鉞擬開府單騎就道理軍務朞月四境懾服駐粵

親王器重欲以巡撫題授固辭晉河南副憲告歸安慶府志

黃之正字貞子太湖人以貢知新會縣未入境海寇攻城甚急
或止其行之正厲聲曰既奉簡任此卽新會主也安忍秦越視
之從閒道入城城值糧絕內籌餉外設備衣不解帶者七十餘
日賊始退自是撫綏殘喘招輯流亡民戴之如父母歷太原同
知以疾告歸安慶府志

黃之麟字瑞白宿松人順治初以貢知江西興國縣縣界楚閩
粵久爲賊巢之麟招降其渠王大勇擊巨賊孫可貴滅之剿平

梅審洞賊曾拱辰寇亂始息寬免賦額墾田糧二千八百石有

奇民深德之敘功紀錄以疾乞歸一統志

陳登瀛字元卿望江貢生知灌陽縣縣自兵燹後戶口逃散田
地荒蕪招徠開墾遂還舊觀升德慶知州以勞卒官兩地皆祠
祀之安慶府志

金繼望字又呂望江拔貢知宜陽縣兵荒之後招集勸墾民遂
樂業擢兗州府管河同知周歷河干修築石香爐梁家樓新月
諸隄水患頓息又以餘力賑饑修曹縣學考最晉九江知府九
江與望江接壤省墓畢不問家事卽單車就道卻私餽勤吏事
以勞卒官一統志

高文徵字子足潛山貢生知平陰縣到任一月河水沒縣東田
數千畝力懇大吏疏請蠲免兵燹之餘重興學校講道課文士

風興起在官僅四月以疾卒士民頌之

安慶府志

汪宗魯字子鳧懷甯人順治壬辰進士知縉雲縣多惠政升知沁州薪水悉自給民有訟刻木為阜隸令自拘到立剖之修城及學宮立義冢養濟院沁有劇盜十數輩為害設法擒獲在官六年民懷其德終禮部員外郎

一統志山西名宦

陳焯字默公桐城人順治初以拔貢入成均選擢中書制誥多出其手請與秋試遂於辛卯壬辰聯捷授兵部主事念親老乞

養歸親歿廬墓三年

安慶府志

方兆及字蛟峰桐城拔貢授中書舍人甲午膺鄉薦屢遷刑部郎中矜慎詳允贊畫平反多所全活升山東濟甯道地當南北之衝治河決獄供億師旅往來戴星出入目不交睫者六七年以勞卒官

安慶府志

葉琪字其玉桐城人以貢知洛陽縣時河決金龍口歲議築塞郡縣供夫運柳為掃具隄上積若邱山洛距河遠民不堪命琪為力請當事柳得折半洛人賴之

安慶府志

倪天樞字臣北桐城人明季流賊逼城建議九條兩上防議事宜狀俱為當事所採而危城得固順治癸酉膺歲薦授崇明訓導捐貲置學田以歲租周士時軍興孔亟天樞督率兵民協守外新橋營溽暑不避勞瘁卒於官

安慶府志

張超載潛山拔貢任通州訓導與諸生言及其父清雅死難事未嘗不流涕亦所以教孝也升知慈利縣政先德化以己資修建學宮邑連苗洞苗多侵民田掠男婦超載單騎入洞宣諭放還人以千計苗私餽二千金卻之不受歸年八十六卒

湖南通志

安慶府志

潘映婁字次魯桐城人明季以貢授台州推官入

國朝擢杭州鹽法道為忌者所誣下吏浙商千餘人號泣稱冤遂

得免調福甯道政務寬慈士民頌之

安慶府志
桐城縣志

姚文烈字覲侯桐城舉人官漢陽推官明允詳慎轉辰州同知

遷楚雄知府地雜民獠文烈撫以恩信人心悅服金山賊伏莽

親馳其營招徠因戢甯之以艱歸士民遮擁車不得前

江南舊
通志

左國林字鶴巖桐城人忠毅光斗子也以舉人授儀真教授薦

升南雄推官持法平恕不冤一民所活疑獄數十人遷河南同

知未之任卒於官

安慶府志

葉文鳳字紫羽桐城人以貢考選推官改知長興縣多異政歲

早齋禱惟虔日徒步詣龍井故事磔犬血井可興龍文鳳毅然

曰龍神物豈可以犬污遂齧指滴血井中澍雨大沛

安慶府志

戴宏烈字山民桐城人以舉人知成都縣地衝民瘠賦調繇役

軍需儲待往來郵傳頓置皆取給焉宏烈應時立辦民無苛擾

尤加意撫綏歲增戶口千餘墾田數萬頃暇則修舉廢墜如武

侯祠堂浣花琴臺以次修復上官方擬薦而宏烈以勞卒

安慶府志

吳子雲字霞蒸桐城人順治乙未進士官國子監助教勤於訓

課升刑部主事權稅臨清專尚寬政商賈悅服晉戶部郎授僉

憲督學河南奏最以參議用乞養歸

安慶府志

姚文燮桐城人順治己亥進士授建甯推官地據閩上游崇山

峻嶺盜賊多為民患俗以睚眦相仇殺案如山積文燮片言立

判囹圄為空閩疆初闢清丈量代民籌款造戰船以甦民困報

最改知雄縣值大水民多流徙文燮招徠復業者予以荒地耕

種捐資築城垣隄岸又請免被水田租修學課士邑志殘缺更

宣化府志 卷之十一
為蒐討士民懷之遷開化同知尋署阿迷州為吳三桂所囚乘
閒逃還滇寇平乞養歸一統志直隸名宦

江皋字在涓桐城人順治辛丑進士知瑞昌縣瑞地鄰楚莠民
多竄山谷開劫掠上官議剿皋多方誘諭盡解散之歷守鞏昌
官軍入蜀皋與帥約軍卒無符信不得入境忽有數騎入村漁
奪悉囚送軍門斬以徇一軍肅然改補柳州偽逆初平殫心綏
輯流亡復業他邑民有被掠在柳者悉資送之飭關津撫獠獠
新柳侯祠柳人嚮學者奉以為師遷四川提學去之日遠近送
者相望不絕後補平慶道運給軍精歷隴塞賀蘭諸險作籌邊
九策擢大參罷歸卒年八十一一統志廣西名宦
姚文燕字翼侯桐城人順治辛丑進士知德安縣值南康賊潰
壓城守兵僅四十人居民百餘家文燕夜撤東西北三門兵民

盡登南城羅銅器以代金裂被帛以為旗東蘆葦以代炬金鼓

震天賊疑援至遂遜舉循良第一例補臺省未任而卒安慶府志

姚銳桐城監生四川梓潼知縣調富順擢知雅州稱敏幹卒於
官其弟合州牧孔鏞卽攝其篆政相頡頏州人比之宋時二呂

雍正七年銳子淮復知雅州亦有賢聲四川通志新增

王尹字亞衡懷甯人順治辛丑進士知順德縣順德繁劇尹一
切供億不取辦里戶嚴絕羨耗順民德之簿書盈案批閱興除
悉中民隱邑素多盜摘發若神皆鳥獸散泣事三載以勞瘁卒
官安慶府志

阮涵字子靜懷甯舉人任襄陽推官因奉裁復令關西力行惠
政山中有百歲老人命兒孫肩輿詣縣請涵出熟視不忍去曰
昔有令某亦江南人仁慈廉恕距今七十餘年乃復見公也入

爲工部主事民牽衣擁馬不得行者屢日安慶府志

盧璣字爾琛潛山貢生知樂昌縣均徭役緩催科喪亂之餘哀

鴻漸集升大名通判擢永甯同知永甯故南詔地羌蠻雜處德

化漸摩俗爲一變署蒙化數月振興文學晉守溫州涖任三月

興利除害以勞卒官江南通志

汪中和字子虛潛山人潛處要衝值軍興賦役不均建議立公

臺法公私便之官江都學博修學課士周給單寒卒於官闔邑

勒碑以志感焉安慶府志

蕭蕙字叢玉太湖歲貢懷甯志云知寶坻縣多惠政嘗築渡濟

民民稱便焉捐資修學請改寶坻爲大學上臺薦廉能第年七十以下

雙親未葬乞休歸年七十餘卒寶坻人請祀名宦采太湖縣志

增同邑曹昌穎官樂昌知縣爲邑請廣學額士林德之安慶府志

孟之麟字睢應太湖拔貢永安知縣時羣盜蜂起官兵雲集軍

事浩繁之麟多方應濟民得不困事平招集哀鴻尤多善政遷

守涿州理煩治劇游刃有餘民甚德之安慶府志

張兆奎字房郁宿松人順治初以歲貢歷鳳陽府教授捐資給

貧生多賴以掇科者遇士患難多方全乞休歸安慶府志

任竣字松翰懷甯進士順治閒由主事歷廣東南韶道勸農輕

徭平反大獄剿平番禺南海新會諸縣賊矜釋無辜民德之懷甯

縣志

張廷琰桐城人雍正二年任福建福清知縣四年春米價翔貴

巨族居奇閉糴奸民乘機強糴廷琰諭以強糴者斬閉糴者配

於是奸民斂跡而巨族減價又請大府開倉平糴民賴以安其

治盜輕者黥面重者刳足宵小無敢邇境福建通志

勞世沅懷甯舉人雍正九年知洪雅縣愛民課士頗多善政於

先哲遺蹟尤加意修葺四川通志 新增

石毓瓚字贊皇宿松人以貢考授中書掌典籍事文辭暢達翰

墨妍整以疾卒於京邸安慶府志

陳五典字藥菴太湖拔貢知麻陽縣愛民重士麻陽運丁解米

四川寇盜充斥生還者少五典詳請改折全活甚眾在任十年

多惠政調息縣升瀘州知州歲旱虔禱甘霖立沛捐俸修學刻

孝經以教士風俗一振解組歸湖南通志 安慶府志

楊臣鄰字欽四桐城人康熙丁未進士知邯鄲縣軍書旁午部

署撫綏民得安堵以艱歸起補光山歲饑賑恤全活無算建義

學振士風光人稱關西夫子安慶府志

姚文熊字望侯桐城人康熙丁未進士知蕭山縣閩亂未定檄

書旁午芻蕘糗糧取給於邑調度有方而民不困又振興文教

優禮賢士遷陝西階州亂後凋敝悉除無名之徵上官按例督

催文熊縛其吏之驕橫者撻而遣之遂從降調先是蕭山蝗起

移文於神忽大風雨蝗盡死又有逸盜自行歸獄曰夢父責之

不可累好官其神化如此既卒蕭人祀之名宦浙江通志

何亮功字次德桐城人以舉人知古田縣為政寬簡與民休息

暇即進諸生談經講學一變其僻陋之習卒於官邑人賻而歸

之安慶府志

姚文焱字彥昭桐城舉人官長洲教諭歲荒為賑糜粥並監藥

局擇醫治疫全活甚多升峽江令革陋規輕徭役峽人德之以

艱歸江南通志

載芳字令及桐城舉人司鐸嘉定擢知仁懷縣值兵燹凋殘之

後極意撫循漸有起色邑歲稅茶數百金芳恐爲商民患罷之

卒於官

安慶府志

劉鴻都字爾雅桐城拔貢知廣昌縣土瘠民稀鴻都召墾荒地千餘頃給以牛種戶口日增民無逋賦設義學勵士風邊徼之

地家絃戶誦致仕歸卒年七十八

安慶府志

何永駿字龍牧桐城人以貢知洪雅縣兵燹之後士荒民疲永駿課文章勸耕織風俗頓變

王師入東川例應洪民解餉禱於江神川水大發舟楫輸送較陸路省費不貲升辰州同知連署府事案無畱牘民咸德之以母老

乞歸

安慶府志

江之泗字四友桐城舉人官通州學正一以鄉里授徒之法教弟子員獎善誘不及情意藹然引年歸諸生紀其教績鐫之於

碑同邑張恂字子岐以貢官崇明縣教諭訓課稱良師升大理

寺司務性至孝迎母就養母思歸卽乞養終其身不出

安慶府志

張芑字武仕桐城人康熙中以貢通判武昌擢知府事裁兵夏逢龍以索餉鼓譟圍巡撫署芑正色叱之賊將加害父老數百

人奔號懇免賊囚之欲授以官芑罵而裂其劄賊犯荆州芑越獄出東抵鄔穴錄狀上部請師剿賊會蘄州叛兵丁原在倡眾

內訌芑與守備李醇計擒斬之駐道士泐檄屬縣討賊賊不敢東下隨振武將軍克復黃州獲逢龍賊平擢工部員外郎

一統志

北名宦

姚士基字履若桐城人以舉人知羅田縣革陋規千金弭盜以牌甲催科以紙阜建公堂遷學宮祠忠烈置義冢設渡筏皆以

實心行實政將應行取而卒羅民焚香泣送建祠祀之稱姚公

會羅田志

張廷瓚字白城桐城人大學士英長子康熙己未進士入翰林陟宮尹趨承講幄屢應纂修之任

聖祖仁皇帝北征沙漠三臨絕塞以儒臣得與扈從之列屢被殊恩益務恪慎分校禮闈典試山左皆弊絕風清尤熟於掌故一切大

著作多出其手子若霖字巖舉天性孝友好義樂施文行兼茂

稱令子焉

江南通志
安慶府志

江廣譽字繡聞桐城人康熙乙丑進士授臨邑知縣嘗謂民猶子也忍腹削其子以自肥乎課賦徵漕曲盡撫字洗滌羨陋爬櫛蠹垢胥吏不敢為奸訟者至庭手批口決曲直立判飛蝗入境為文告神蝗盡徙去邑乏甘泉至是涌出民勒石曰江公井以疾卒官

安慶府志

陳堂謀字大匡桐城歲貢授青浦司訓改丞束鹿上臺重之屢署州縣篆於束鹿則平牙行斗斛禁田糧詭寄於故城則免挑河之苛派革糧里之幫解丈景州積年未清之廠除邠州額外私徵之稅以艱歸遂不出

安慶府志

王玘字其人桐城人由廩貢教習授樂城知縣歲革羨餘千金浚井數百助民灌田樂人德之遷紹興通判開濬三江閘及杭城內通商河道俱百餘年堙廢之蹟又佐開高寶等處下河監督丁溪草堰兩海口遵限報竣以卓異遷南河同知尋升彰德知府致仕歸

江南通志
安慶府志

吳玉藻字冰持桐城人以貢官內閣中書乞養歸親歿服除補成都同知勤於吏治案無畱牘攝馬湖雅州諸篆皆有治聲卒於官貧無以斂上官爭賻之櫬始得歸

安慶府志

姚士重字勃少桐城拔貢授宣城訓導建培風閣以養士遷新
喻縣丞署高安篆高安苦徭役不均為破圖編里民咸稱便勒
石誌愛又署新喻篆以漕務不忍苛民致仕歸安慶府志

錢旆字菽邕桐城人康熙戊辰進士知蒼溪縣以廉靜為治上
官或謂其不能試委署他郡縣公事立辨治獄悉中情法乃更
有能名將奏最而旆卒蒼民哀慕致賻以歸其喪安慶府志

孫元衡字湘南桐城人以貢知新城縣濬孝婦小清兩河以殺
水勢築隄十八里以捍水衝捕蝗賑濟全活無算以卓異擢蜀
之漢州招徠流亡給牛勸耕會爐蠻蠢動身歷行閒轉運不匱
擢臺灣同知建文廟設義學歲饑令商船俱運米多者重其賞
否則罰於是南北客艘雲集米價大減民遂得不飢升東昌知
府母喪歸郡民塞道號泣一統志 福建各宦 江
南通志 安慶府志

張夔字次皋桐城人以貢歷知平山固安清苑皆畿輔近邑有
鄂民疑獄久未決夔至立辨又章氏婦為強暴所偏廉得其狀
一時稱為神明舉荒政建義學毀淫祠所至仁惠有聲擢大名
廣平兩郡同知督理河務漳水決身親畚鍤捍禦隄防河患乃
息又捐俸賑給活災民數千人以勞卒官士民請祀名宦江南
通志
高可極字爾建潛山歲貢知永豐縣下車即詳食鹽免充廣餉
捐買馬不起民夫以老乞歸士民焚香泣送數十里江南
通志
姚士塾字庠若桐城歲貢官碭山教諭提撕鼓舞一變其風遷
朝邑知縣首革編審費千餘金秦大饑流民載道捐資數千金
設粥廠四以食之令胥役搜灌莽中遺嬰負乳婦育之瘞其殮
贖民婦之鬻者還其夫以痺疾請告歸數年而朝邑民猶絡繹
來問疾卒祀之名宦安慶府志

姚士暨字注若桐城人以貢司諭睢甯培育寒士置祭器建烈女祠歷遷刑部郎精律例論決平反大司寇佛倫張玉書亟稱其才他司疑獄必令覆閱始奏值河南有大獄株連不休

詔擇員往勘以暨對

上曰此故尚書姚文然子耶宜可使果得情以報因病乞歸

安慶府志

咎茹穎字仲遂懷甯人康熙壬辰進士纂修子史精華授內閣

撰文中書舍人掌絲綸誥敕多出其手性孝友父瑩未厝不安

枕席兄蔚林官會稽令以吏事解官茹穎憂思成疾而卒

安慶府志

姚士堂字佩若桐城舉人官中書舍人勤於其職所書制敕閣

下環觀歎絕入武功館纂修方略宏偉有制總裁者命以為程

安慶府志

方將字當時桐城歲貢歷官孝豐知縣減耗金寬徭役以廉讓

為教訟牒日稀攝吉安長興篆所在有聲邑紳士紀其政鐫之

石

安慶府志

倪灝字繪江桐城人官高平丞卻稅羨千金值西陲有兵事造

車轉饗戴星辨理刻期不踰捕蝗長平驛齋戒籲天蝗盡他去

盜據山為患灝搗其巢平之遷令南漳歲饑甫請賑貸即開倉

散給修泮宮建義學善政甚著

安慶府志

方正璠字絃長桐城人知五臺縣居官廉惠治獄多所平反活

死囚二十餘人修學宮舉荒政築河隄造船資往來邑人賴之

安慶府志

吳昉字五玉桐城副貢司鐸豐縣士習文風為之丕變再攝邑

篆有豪民殺人者輦金求釋卒抵之法年八十卒於官士民道

祭者皆哭失聲

江南通志

夏瓚字景文桐城選貢知呈貢縣振興文學革除陋規給牛種以勸墾歲饑多方賑救全活甚眾以病乞歸江南通志

倪念祖字紹衣桐城副貢知福安縣吏某為妖崇數年草檄毆之妖立滅有奸民名鐵機或僧或俗詭異非常為鄉里害前令捕之不獲念祖計擒而寘之法卒於官櫬歸哭送者數十里不絕安慶府志

張有孚字鶴田桐城人以貢歷南川知縣南邑踞萬山中地僻民稀令此者率傳舍視之有孚捐資廣衙舍修通道路招集開墾立義學課其子弟之秀者革里長以省民費民甚便焉為治九年四方就居者千百餘家地以富饒民以安樂卒於官民祠祀之安慶府志

張若需字雲舉桐城舉人任嚴州同知攝義烏篆捐金造東門

義橋邑人名張公永濟橋建祠橋側祀之遷梧州守輯盜安民平糶給種多著善蹟擢蒼梧鹽驛副使病卒

特贈按察使銜祀廣西名宦江南通志

羅士修宿松人康熙中知湘陰縣嘗署聯於門以暮夜金為誓歷署劇邑俱有聲湖南通志

何景宣字在中宿松歲貢授上元訓導適海氛抵石頭率諸生七百餘人登城捍禦寇平總督列名疏題有內固外防保守封疆之語奉檄署高淳溧陽兩學篆振興文教並為諸生釋呈誤清積逋後補英山宜興教諭兩學廟皆傾圮捐俸倡導殿廡祠署皆鼎新委署宜興篆卒於官士民立坊表之宿松縣志

吳雙潛山歲貢康熙四十六年知德陽縣仁明清苦不傷財不勞民邑人德之去之日紳民壕像於許旌陽之側四川通志新增

重修安慶通志 卷一百一十一
姚孔鏞字祝如桐城貢生康熙四十六年四川合州知州興學
重農催科不擾民樂輸將歷八載卒於官士民哀慕不忘四川通志

增王文燦字蔚然桐城人明末避兵入粵籍蒼梧中康熙癸卯舉
人任清遠縣有惠政以招叛功當遷官顧以母老告降改象州

學正廣西通志

魯之裕字亮儕太湖人康熙庚子舉人授內閣中書出為河南
確山知縣嘗奉委摘中牟令李某印知其冤代白制府釋之歷
官至清河道上疏請廣從祀又疏申禁酷酒及天主教收徒回
教不遵正朔又請興畿南營田水利及依科截取舉人後多准
行以直隸布政使參政致仕所著有長蘆鹽志下荆南志式馨
堂詩文集太湖縣志
并呈册

龍光字二為望江人康熙丁未進士授中書出任太原同知詳
請逃人連坐隱匿真正東人則坐新買小卒則不坐得永著為
令署甯化縣時耿逆總兵張彬殺謝尙謀占其妻妻逃鳴冤光
案彬罪詳請立斃杖下升守臺灣時海氛猶未靖操練防守海
疆以安卒年九十望江縣志

龍燮字理侯光之弟康熙戊午以薦舉鴻博授翰林檢討與修
明史遷編修改大理寺正據經以決疑獄眾共推之後為工部
員外郎卒望江縣志

黃宗顥字雲子太湖人官湖北大冶丞值夏醜煽動民多逃竄
拊循慰勉得免流散署通山篆有牛銜利刃奔階下使人尾之
偵得屠者論如法邑稱神君又署嘉魚奉檄修隄凡已廢陂堰
盡復之卒於官其子鬻產始得扶櫬歸太湖縣志

余光全字完子潛山人康熙壬戌進士知安南縣邑多苗蠻羣聚為奸光全下車慨然曰此莫非吾赤子資生無策故至此耳為嚴行保甲法有游手者畀以牛耕勸使歸田一時安堵士民立祠祀之後升戶部主事解組歸

潛山縣志

張廷玉字衡臣桐城人大學士英次子康熙庚辰進士選庶常授檢討歷官

保和殿大學士加太保封三等伯立朝五十餘年為刑部侍郎時山東鹽販糾眾不法巡撫獲之以謀逆奏廷玉奉

命同都統託賴等往訊盡得其情誅其渠魁餘多原有雍正初充

聖祖仁皇帝實錄館總裁二年疏言浙江江西棚民之害請編入戶口

其未久者取具連環保結下督撫議行十一年條奏慎刑二事請刑部分別人犯收禁取保及引例不確應令都察院大理寺

駁正皆下九卿議行

高宗純皇帝御極充

世宗憲皇帝實錄館總裁三年

上將視學

命軍機大臣議奏三老五更之禮廷玉疏言其不可行者數端

上違其言十五年以年屆八旬

恩准致仕家居五載終於里第年八十四

賜祭葬諡文和配享

太廟所著有奏疏及詩文集若干卷

一統志
桐城縣志

孟安世字康子懷甯舉人邳州學正康熙時河決學宮圯安世捐建東廡請復優免銀佐士子膏火著寒燈閣詩讀書堂文集

懷甯縣志
新增

楊汝穀字令貽懷甯人康熙庚辰進士知浦江縣有異政行取擢主事遷郎中授監察御史劾奏河南南陽鎮標兵以查拏賭博辱知府沈淵寅兵於法總兵以下論如律擢太常少卿奉天府丞晉右通政雍正元年奉

命祭告少昊金天氏等陵擢通政使遷左副都御史晉兵部右侍郎奉

命往清口致祭河神復奏隄堰濬築事宜轉左侍郎乾隆元年奉

命祭告南嶽奏免河南榮澤縣坍塌地錢糧三千餘兩及除河北太和

山香稅民咸便之調戶部左侍郎擢左都御史以老致仕卒

賜祭葬諡勤恪著有靜用齋集十五卷

一統志

江爲龍字我一桐城人康熙庚辰進士知宜春縣修泮宮建義學以直恕聞擢兵部主事監賑直隸饑民經畫盡善制府薦爲賢能第一丁酉典試山西歷官文選司員外郎

桐城縣志

張廷璐字寶臣廷玉弟康熙戊戌榜眼授編修歷官禮部左侍郎兩爲南宮分校三典直省鄉試爲江蘇學政九載弊絕風清乾隆元年

諭祭大學士張英於本籍

命廷璐就任所回里舉襄典禮四年回京奉

旨纂修五禮悉心蒐討博求典籍參之時宜而一代不刊之典以定九年以老致仕明年卒著有詠花軒詩文集

桐城縣志

張廷瑒字桓臣廷璐弟雍正癸卯進士選庶常授編修歷官侍講學士疏稱嚴禁賭具責成同居父兄伯叔互相覺察容隱者照竊盜同居例治罪出首者除不連坐外本犯罪作議減北直大水督臣請以工代賑稍給工食廷瑒疏言官給半直富民有田資隄者亦給半直則饑民方濟

上躋其言允行焉十二年擢工部右侍郎乾隆初充

世宗憲皇帝實錄館副總裁元年充會試副考官五年提督江蘇學政

九年以內閣學士典試江西十一年以病乞休歸

桐城縣志

姚孔鎰字翰擢桐城人官永平知縣擢滄州知州歲饑官賑止

正月乃捐廉為紳士倡加賑至麥秋時民無餒者時以滄地濱

海初設駐防兵民相構釁乃多方開導準以情理之平地方帖

然後以艱歸起補葭州知州積勞成疾卒滄人祀之名宦

桐城縣志

楊之駢宿松貢生康熙時由太平教諭令公安勤於撫字尤加

意學校嘗捐俸修名宦鄉賢祠又建武侯祠竹林書院給義學

膏火官六年去任父老郊餞斤斤以勤儉為屬

宿松縣志引公安縣志

王應珮字韻瑒望江人康熙己丑進士授內閣中書出為河南

通許令攝蘭陽捐資備學宮樂器己亥辛丑豫比不登哀鴻徧

野應珮百計安集民免流離以卓異擢大理評事歷監察御史

卒於官

望江縣志

方正玠字攷采桐城舉人知無極縣縣之木道溝界流沙中溝

常淤阻田苦沙壅水發復泛濫為害正玠疏通溝道田皆得耕

民有被誣為盜滯獄三年者為廉得真盜雪其冤擢福州理事

同知署永春州永民好械鬪互有殺傷到官復論抵正玠誠論

備至俗漸革乞休歸

桐城縣志

左宰字籬三桐城人康熙辛卯舉人知建陽縣耿逆之變民人

逃避田賦拖欠往往令本族及里甲代償前令李六成憫民之

艱為虛報荒田若干頃開銷抵算後人不察以為冒免稟請開

復宰涖任後據實稟請上憲開豁大吏知其誠允之宰居官清

慎而此事尤為一邑永利云

桐城縣志

左文高字迓平桐城人雍正丁未舉孝廉方正知遷江縣革陋
規剔衙蠹上林爲遷江鄰邑有樊氏聚眾爲寇鎮府剿捕賊將
竄入遷江文高召土丁諭以利害眾皆聽命乃屬營將伐木樹
柵掘濠塹自率壯勇入山崗中遷江之通賊者方椎牛釀酒以
待上林之賊猝遇官兵一時驚潰文高搜捕凡三百人以首惡
伏法餘多全宥竟以勞成疾乞歸而卒

桐城縣志

方正瑗字引除桐城舉人授內閣中書轉工部郎中釐剔奸弊
旋授陝西布政司參議分守潼關道屢辦軍需出嘉峪關轉輸
糧餉以幹略稱創關西書院與諸生講學士風以振丁內艱以
軍需故給假三月治喪懸缺以待關中民多有以訟事至桐求
申理者

桐城縣志

張廷慶字容懷桐城貢生教習知安陸縣調江夏縣濱江皆隄

京口尤險雍正己酉夏雨甚隄將潰廷慶奔走雨中往來相度
築塞隘口雨不止而水愈急乃仰天長號願投水以延萬民之
命百姓抱泣須臾雨止水退民慶更生歷升湖北糧儲道
張廷球字澤臣桐城人雍正中歷任永福福清等縣值漳浦不
靖廷球往招安單騎抵境流涕曉諭民皆感泣亂遂戢擢知龍
巖州在任十二載去之後民追思其德建祠祀之

桐城縣志

皇朝乾隆十二年庚子六月庚辰日...
 教習...
 命百按...
 榮泰...
 京口...

